





**IMAGE EVALUATION
TEST TARGET (MT-3)**



**Photographic
Sciences
Corporation**

23 WEST MAIN STREET
WEBSTER, N.Y. 14580
(716) 872-4503

1.5 2.8 2.5
1.8 3.2
2.0 2.2
2.5 3.6
3.0 4.0
4.5 5.0
5.5 6.0
6.5 7.0
7.5 8.0
8.5 9.0
9.5 10.0
10.5 11.0
11.5 12.0
12.5 13.0
13.5 14.0
14.5 15.0
15.5 16.0
16.5 17.0
17.5 18.0
18.5 19.0
19.5 20.0
20.5 21.0
21.5 22.0
22.5 23.0
23.5 24.0
24.5 25.0
25.5 26.0
26.5 27.0
27.5 28.0
28.5 29.0
29.5 30.0
30.5 31.0
31.5 32.0
32.5 33.0
33.5 34.0
34.5 35.0
35.5 36.0
36.5 37.0
37.5 38.0
38.5 39.0
39.5 40.0
40.5 41.0
41.5 42.0
42.5 43.0
43.5 44.0
44.5 45.0
45.5 46.0
46.5 47.0
47.5 48.0
48.5 49.0
49.5 50.0
50.5 51.0
51.5 52.0
52.5 53.0
53.5 54.0
54.5 55.0
55.5 56.0
56.5 57.0
57.5 58.0
58.5 59.0
59.5 60.0
60.5 61.0
61.5 62.0
62.5 63.0
63.5 64.0
64.5 65.0
65.5 66.0
66.5 67.0
67.5 68.0
68.5 69.0
69.5 70.0
70.5 71.0
71.5 72.0
72.5 73.0
73.5 74.0
74.5 75.0
75.5 76.0
76.5 77.0
77.5 78.0
78.5 79.0
79.5 80.0
80.5 81.0
81.5 82.0
82.5 83.0
83.5 84.0
84.5 85.0
85.5 86.0
86.5 87.0
87.5 88.0
88.5 89.0
89.5 90.0
90.5 91.0
91.5 92.0
92.5 93.0
93.5 94.0
94.5 95.0
95.5 96.0
96.5 97.0
97.5 98.0
98.5 99.0
99.5 100.0

**CIHM/ICMH
Microfiche
Series.**

**CIHM/ICMH
Collection de
microfiches.**



Canadian Institute for Historical Microreproductions / Institut canadien de microreproductions historiques

© 1984

1.5 2.8 2.5
1.8 3.2
2.0 2.2
2.5 3.6
3.0 4.0
4.5 5.0
5.5 6.0
6.5 7.0
7.5 8.0
8.5 9.0
9.5 10.0
10.5 11.0
11.5 12.0
12.5 13.0
13.5 14.0
14.5 15.0
15.5 16.0
16.5 17.0
17.5 18.0
18.5 19.0
19.5 20.0
20.5 21.0
21.5 22.0
22.5 23.0
23.5 24.0
24.5 25.0
25.5 26.0
26.5 27.0
27.5 28.0
28.5 29.0
29.5 30.0
30.5 31.0
31.5 32.0
32.5 33.0
33.5 34.0
34.5 35.0
35.5 36.0
36.5 37.0
37.5 38.0
38.5 39.0
39.5 40.0
40.5 41.0
41.5 42.0
42.5 43.0
43.5 44.0
44.5 45.0
45.5 46.0
46.5 47.0
47.5 48.0
48.5 49.0
49.5 50.0
50.5 51.0
51.5 52.0
52.5 53.0
53.5 54.0
54.5 55.0
55.5 56.0
56.5 57.0
57.5 58.0
58.5 59.0
59.5 60.0
60.5 61.0
61.5 62.0
62.5 63.0
63.5 64.0
64.5 65.0
65.5 66.0
66.5 67.0
67.5 68.0
68.5 69.0
69.5 70.0
70.5 71.0
71.5 72.0
72.5 73.0
73.5 74.0
74.5 75.0
75.5 76.0
76.5 77.0
77.5 78.0
78.5 79.0
79.5 80.0
80.5 81.0
81.5 82.0
82.5 83.0
83.5 84.0
84.5 85.0
85.5 86.0
86.5 87.0
87.5 88.0
88.5 89.0
89.5 90.0
90.5 91.0
91.5 92.0
92.5 93.0
93.5 94.0
94.5 95.0
95.5 96.0
96.5 97.0
97.5 98.0
98.5 99.0
99.5 100.0

Technical and Bibliographic Notes/Notes techniques et bibliographiques

The Institute has attempted to obtain the best original copy available for filming. Features of this copy which may be bibliographically unique, which may alter any of the images in the reproduction, or which may significantly change the usual method of filming, are checked below.

L'institut a microfilmé le meilleur exemplaire qu'il lui a été possible de se procurer. Les détails de cet exemplaire qui sont peut-être uniques du point de vue bibliographique, qui peuvent modifier une image reproduite, ou qui peuvent exiger une modification dans la méthode normale de filmage sont indiqués ci-dessous.

- Coloured covers/
Couverture de couleur
- Covers damaged/
Couverture endommagée
- Covers restored and/or laminated/
Couverture restaurée et/ou pelliculée
- Cover title missing/
Le titre de couverture manque
- Coloured maps/
Cartes géographiques en couleur
- Coloured ink (i.e. other than blue or black)/
Encre de couleur (i.e. autre que bleue ou noire)
- Coloured plates and/or illustrations/
Planches et/ou illustrations en couleur
- Bound with other material/
Relié avec d'autres documents
- Tight binding may cause shadows or distortion
along interior margin/
La reliure serrée peut causer de l'ombre ou de la
distortion le long de la marge intérieure
- Blank leaves added during restoration may
appear within the text. Whenever possible, these
have been omitted from filming/
Il se peut que certaines pages blanches ajoutées
lors d'une restauration apparaissent dans le texte,
mais, lorsque cela était possible, ces pages n'ont
pas été filmées.
- Additional comments:
Commentaires supplémentaires:

- Coloured pages/
Pages de couleur
- Pages damaged/
Pages endommagées
- Pages restored and/or laminated/
Pages restaurées et/ou pelliculées
- Pages discoloured, stained or foxed/
Pages décolorées, tachetées ou piquées
- Pages detached/
Pages détachées
- Showthrough/
Transparence
- Quality of print varies/
Qualité inégale de l'impression
- Includes supplementary material/
Comprend du matériel supplémentaire
- Only edition available/
Seule édition disponible
- Pages wholly or partially obscured by errata
slips, tissues, etc., have been refilmed to
ensure the best possible image/
Les pages totalement ou partiellement
obscurcies par un feuillet d'errata, une pelure,
etc., ont été filmées à nouveau de façon à
obtenir la meilleure image possible.

PAGES TRIMMED VERY CLOSE TO EDGE OF TEXT.

This item is filmed at the reduction ratio checked below/
Ce document est filmé au taux de réduction indiqué ci-dessous.

10X	12X	14X	16X	18X	20X	22X	24X	26X	28X	30X	32X
			✓								

The copy filmed here has been reproduced thanks to the generosity of:



Thomas Fisher Rare Book Library,
University of Toronto Library

The images appearing here are the best quality possible considering the condition and legibility of the original copy and in keeping with the filming contract specifications.

Original copies in printed paper covers are filmed beginning with the front cover and ending on the last page with a printed or illustrated impression, or the back cover when appropriate. All other original copies are filmed beginning on the first page with a printed or illustrated impression, and ending on the last page with a printed or illustrated impression.

The last recorded frame on each microfiche shall contain the symbol \rightarrow (meaning "CONTINUED"), or the symbol ∇ (meaning "END"), whichever applies.

Maps, plates, charts, etc., may be filmed at different reduction ratios. Those too large to be entirely included in one exposure are filmed beginning in the upper left hand corner, left to right and top to bottom, as many frames as required. The following diagrams illustrate the method:



L'exemplaire filmé fut reproduit grâce à la générosité de:

Thomas Fisher Rare Book Library,
University of Toronto Library

Les images suivantes ont été reproduites avec le plus grand soin, compte tenu de la condition et de la netteté de l'exemplaire filmé, et en conformité avec les conditions du contrat de filmage.

Les exemplaires originaux dont la couverture en papier est imprimée sont filmés en commençant par le premier plat et en terminant soit par la dernière page qui comporte une empreinte d'impression ou d'illustration, soit par le second plat, selon le cas. Tous les autres exemplaires originaux sont filmés en commençant par la première page qui comporte une empreinte d'impression ou d'illustration et en terminant par la dernière page qui comporte une telle empreinte.

Un des symboles suivants apparaîtra sur la dernière image de chaque microfiche, selon le cas: le symbole \rightarrow signifie "A SUIVRE", le symbole ∇ signifie "FIN".

Les cartes, planches, tableaux, etc., peuvent être filmés à des taux de réduction différents. Lorsque le document est trop grand pour être reproduit en un seul cliché, il est filmé à partir de l'angle supérieur gauche, de gauche à droite, et de haut en bas, en prenant le nombre d'images nécessaire. Les diagrammes suivants illustrent la méthode.

re
détails
es du
modifier
er une
filmage

es

errata
l to.

t
e pelure,
on à



THE EPISTLE
OF
PAUL THE APOSTLE
TO THE
CORINTHIANS,
TRANSLATED INTO THE MOHAWK LANGUAGE.

BY WILLIAM HESS,

WITH CORRECTIONS BY

J. A. WILKES, Jr.

NEW-YORK:

PUBLISHED BY HOWE & BATES,
FOR THE YOUNG MEN'S BIBLE SOCIETY OF NEW-YORK
AUXILIARY TO THE
BIBLE SOCIETY OF THE METHODIST EPISCOPAL CHURCH.

1836.

NE TYOTYERENHTONH

KAHYATONHSERA

NE PAUL

NE ROYATADOGENHTI SHAGOHYATONNI

JINONKA NE

CORINTHIANS,

WILLIAM HESS,

TEHAWEANATENNYON ONI SHOGWATAGWEN NE

J. A. WILKES, Jr.

NEW-YORK :

PUBLISHED BY HOWE & BATES,
FOR THE YOUNG MEN'S BIBLE SOCIETY OF NEW-YORK,

AUXILIARY TO THE
BIBLE SOCIETY OF THE METHODIST EPISCOPAL CHURCH.

1936.

NE TYUTYADONGHSERATYERENGHDONH
NE PAUL ROYADADOKENGHDY
YEGHSHAKOGHYADONNYH NE JINJNKA NE
CORINTHIANS.



CHAPTER I.

Oghnakenkeh nenshadehhodennonghweronghkwenthonh neony shihhodonrenh, waghshakoghrejaron ne skanikonrat kenhak.

PAUL, ne ronwayadarakwenh ne ro-nhaonh ne Yesus Keristus ne aoriwa jieghnitho-nikonghrodenh ne Niyoh, ony ne *Sosthenes* onwadadekenhah,

2 Ji-nonka ne raotyughkwadokenghdikeh ne Niyoh ne ne eghradideron *Corinth*, ne ne ro-nonhha ne shonwadiyadaderighstonh Keristus-tserakonh Yesus, ne shonwadinadonghkwenh rodiyadadokenghdy, thondakakwekde ji ok nonweh jiwadonghwenjade ronwaronhyenhare ne raoghsenna ne Yesus Keristus Eghjhidewayaner, thadejaronh shadeyonkwa-wenh :

3 Kendenron wayon nisekeh, ony kayanerenh, dakayenghdaghkwe Niyoh-neh Eghjhidewanihhah, neony dakayenghdaghkwe Royaner-neh Yesus Keristus.

4 Dehhinonghweradonghs Ake-Niyoh tyutkonh ne ne ise sewayadake-nhaghtsera, akarihonny ne raodenrat ne Niyoh, ne ne ji-nahhoden tyetshiyawih ne Yesus Keristus ;

5 Ne ne orighwakwekonh wahhy ne sewatshokowaghtsera ne raonhhakeh, yekakwekonh ne jisewadadighs, nokhony ne Kanikonghrowanenghtsera yekakwekonh ;

6 Shadeyught ony jirorighwagh niratstaghkwenh ne Keristus orighwiyu wahhy odokenhonh roweyennendaonh nise-tserakonh;

7 Etho kady yahhoghnaken thaesonnyade ne ji-nahhoden yondadawyh; sewanonghne ne ji-nadentre ne Eghjhidewayaner Yesus Keristus:

8 Onghka kady ony shaden-yawenne enjesayadaghnirade ne ne jiyeyuderihhokde, ne ne aontyesen aonsesaderighwagh-rako ne raodeghniserakonh ne Eghjhidewayaner Yesus Keristus.

9 Niyoh naah thorighwayery, raonhhakeh yeghjhisewaronghyenhharonh ne ne ji-nonka ne skariwat skanikonrat aese Wade ne ne Royenhah Yesus Keristus Eghjhidewayaner.

10 ¶ Ne nonwa Wakwennidenghden, dewadadekenhah, ne raoghsennakonh ne Eghjhidewayaner Yesus Keristus, ne ne sewakwekonh ok ne shakat skariwat ensewadatyade, nokhony yaghtaesewennikonghroghwihha ne sewentyughkwakonh; ok daghnon kaweyennendaonhhak yadesewatyeghstonhhak skanikonrat kenhhak nokhony ok ne shakat kenhhak ne sewayadoreghdaghxhera.

11 Ikenh nense karihhowanaghdennyh ne iscekeh, dewadadekenhah, agaonha yonkhrori ne ne eghradideron ne jirononghsode ne *Chloe*, ne ne deyuriwadeh deyerighwake-nhaghs ne sewentyughkwakonh.

12 Nonwa ne ne kenhenh *Kadon*, Ne ne jiniyadejonh sewadonghs, I-ih-neh ne *Paul*; ony I-ih-neh ne *Apollos*, nokhony I-ih-neh ne *Cephas*; neony I-ih-neh ne Keristus.

13 Dehhodennikonghrakhaghsyonkwenh kenh ne Keristus? dehhonwayendanhare kenh ne *Paul* ne ne ise aesewaribhonnike? nendenhens neeh kenh sewatnekoseraghdonh ne raoghsenna ne *Paul*?

14 Wahhiyadonren ne Niyoh ne ne yahhonghka Dekheghnekoserhonh ne jinijonh, ne ok ne *Crispus* nok *Gaius*:

15 Onwaneken kaneka en-yondonhheke ne wakatnekoseraghdonh nakwah iih axhennakonh.

16 Neony I-ih kheghnekoserhonh ne rao-nonghsakonh raogh wajira ne *Stephanis*; yadeskadeshon, Yaghdewakaderyendare kaneka oya aakheghnekoserhon,

17 Ikenh ne Keristus yaghdethake-nhaonh ne nakhegh-
nekoseraghwe, ok tenhnon nenkaderighwaghnodon norigh-
wadokenghdy; yah ne tegatstha ne kanikonghrowanenghtsera
nowennaokon, onwa neken ne jidehchonwayaghsonde ne Ke-
ristus yaghkariwa thenwadonghsere.

18 Ikenh ne ronwanaderighwaghnodonse ne ro-nonhha-
keh ne jidekayaghsonde ne ro-naghdonnyh, ronneghre ken-
deghsera; nok nonkyonhhakeh ne jonkwayadakwenh, ne
wahhy ne raoshattenghsere ne Niyoh.

19 Ikenh kaghyadon naah, Enkaghdonde ne raodinikon-
ghrowanenghtsera ne rontdokhase, nokhony yahhothe-non
thiyadaonsayurihhondane neghniwatdokhatserodenh yakoda-
derihhonnyennyh.

20 Ka-neh rontdokhase? Ka-neh shakodighyadonny? ka-
neh dehhodiriwadeh nekenh yonghwenjade? yaghkenh Ni-
yoh kendeughsera dehhaonnyadonh ne kanikonghrowanenght-
sera nekenh yonghwenjade?

21 Ikenh ne oghnakenkeh, ne rao-nikonghrowanenghtse-
rakonh ne Niyoh, ne ne kanikonghrowanenghtsera ne jiyon-
ghwenjade ne nyaghdehchonwayenderighne ne Niyoh, thawe-
ryendiyughs ne Niyoh ne ji-nikendeughserodenh ne jiyonde-
righwaghnodon ne ne naonsahhodiyaadako naondahhonnegh-
daghkwe.

22 Ikenh ne *Jews*-aka radirighwisax ne wade-nyendengh-
stonh, neony ne *Greeks*-aka ronnesax ne kanikonghrowan-
enghtsera :

23 Nok yakwaderighwaghnodon ne Keristus jidehchon-
wayendanhare, ne *Jews*-akakeh ne tho-naghdeekon ne jika-
konghretshakeron, nok ne ro-nonhhakeh ne *Greeks*-aka thi-
yehhodirighwaraonh ;

24 Nok ro-nonhhakeh ne ne ronwadinadonghkwenh, ye-
kakwekdonh ne *Jews*-aka nokhony ne *Greeks*-aka, Keristus
ne raoshattenghsere ne Niyoh, neony rao-nikonghrowan-
enghtsera ne Niyoh.

25 Asekenh ne raodeghsera ne Niyoh shakotdokhatsera-
kennyonh ne onkwehhokon ; neony ne jiyukenhheyonh ne
Niyoh senlha ne kashatste ji-niyugt nonkwehhokon.

26 Ikenh desewakanere jiniyoht jiyetshironhyenharonh, dewadadekenhah, oghniyutyerenh yaghdeyudonkwedakade nayako-nikonghrowanen, konwaghsera ne owaronh, yaghdeyutkade nayuneghrakwaghdon nakoshatstenghsera, yaghdeyutkade ne yonkwedanoron, ne ayondade-nadonghkwe:

27 Niyoh rorakwenh ne thiyurighwendese ne jiyonghwenjade ne ne daodinikonryake daodinikonrharen ne rodinikonghrowanenghse: nokhony Niyoh rorakwenh ne yurighwakenhheyonh ne jiyonghwenjade ne ne dakanikonrharen jiyuneghrakwaghde-nyon kashatstenghsera;

28 Neony ne ne yurighwendenghde-nyon ne jiyonghwenjade, neony ne karighwaokon ne ji-nahhoden nyudaghkwaswat, Niyoh rorakwenh, etho orighwiyu, neony ne karighwaokon ne ne yaghnedekenh, ne ne enkakweny nyahhothe-non thiyadayurihondane ne karighwaokon nethoh;

29 Ne neh yahhoghthaowaghroden thayakaonwesaghde ne jidehhakanere.

30 Nok ne ne raonhhakeh sewayendaghkwen ne Keristustserakonh Yesus, raonhha wahhy ne Niyoh shonkwagh-senhennyh nonkyonhhakeh ne kanikonghrowanenghtsera, nokhony natdakwarighsyonghtsera, ony enseghshakoyadado-kenghdighste, nokhony seghshonkwaghnerenghsyongh;

31 Wahhy ne entyuyanenhawe ase eghniyught jikaghyadon, Raonhha ne ne enghronwesaghde, kinyoh raonwesaght ne Royanertseragonh.

CHAP. II.

Paul *wahharihhowanaghde ne raoderighwaghnodonght:era,*
ne raoshatstenghsera ne Niyoh.

NEOONY I-ih, dewadadekenhah, ne o-nenh shakewe ne isekkeh, yaghdewakewennaneghrakwaghdonhhatye ne jiwa-kewe, nedenhens ne kanikonghrowanenghtsera, kwarihhowanaghdenne ne isekkeh ne ne Niyoh rakerighwaghniradyh ne ne tokenghskeonweh.

2 Ikenh Dêwakennikonrakonde ne ne yahhoghthaorihhoden thenwakaderyendarake ne sewentyughkwakonh agwah ne ok neh Yesus Keristus ony raonhha dehhowayendanhare.

3 Neony I-ih shidewese ne jiyukenhheyonh, nokhony ne kaghderonghxherakonh, ony eso yuyadishonghk.

4 Neony nakwadatyatsera nokhony nakwaderighwaghno-donghtsera yah ehtewagyeren naonkewennaweyenston ne akerihhoryaneron ne onkweh ako-nikonghrowanenghtsera, ok dagnon adokenhonh thaonderighwakwatho ne Kanikonra, nokhony ne kashatstenghsera ;

5 Ne ne jidiseweghdaghkonh yahheghthakadane ji-nonweh ne onkwehhokonh ako-nikonghrowanenghtsera, ok dagnon ne raoshatstenhsera ne Niyoh.

6 Ethosane ne wakwadatyade ne kanikonghrowanenghtsera ne raodityughkwakonh ne ne yakodadeweyennendaonh : shekonh yaghden ne kanikonghrowanenghtsera ne ne kenikenh yonghwenjade, yaghden ony ne yeyadanoronshon ne ne kenikenh yonghwenjade, ne nenne-eh nenwaghdon ;

7 Nok nonkyonhha ne wakwadatyade ne rao-nikonghrowanenghtsera ne Niyoh ji-nonweh ne yaghdeyokent, shadeyught ony ne jiwaghseghdonh ne kanikonghrowanenghtsera, ne ne ji-nahhoden ne Niyoh rorighwison rorihhowanaghdonh arekho shiyonghwenjade ne iih onkyonwesenghtsera ;

8 Ne ne ji-nahhoden ne nyaghkaneka ne yeyadanoronshon ne kenghyonghwenjade nao-naderyendarake ; asekenh naonaderyendarake, yaghkina thao-neron deghshakwayendanharenh ne Royaner ne onwesenghtsera.

9 Nok, eghse-niyught jikaghyadon, Yagnokara deyudikenh, yaghden ony nohhonghda deyunaghronkenh, yahhony thayakotyenny nakaweryaghsakonh nonkweh, ne ji-nakarihhodenshon ne Niyoh shakoghscronnyaghkwenhowy ne ne ronwanoronghk'wa.

10 Nok Niyoh shongwatogateanih shongwanhotongweanih wahonni ne rao-nikonra : ikenh ne na ne Kanikonra ne orighwakwekonh ne denwaghkwakayonde, etho orighwiyu, ne yurighwaghnodes ne Niyoh-neh.

11 Ikenh onghka ne onkweh yakoderyendare ne ji-nika-rihhodense ne onkweghneh, ne ok neh ne kanikonra ne onkweh iwat nakaonhhatserakonh? eghkady niyught ony, ne karighwaokon ne Niyoh-neh yahhonghka ne onkweh deyakoderyendare, ne ok ne Niyoh Rao-nikonghradokenghdy.

12 Onenh wahhy yonkwaye-nah, yaghnedekenh ne kanikonra ne onkwehhokonkeh, ok daghnon ne ne Kanikonra ne Niyoh-neh; ne ne aontyesen ayonkwaderyendarane ne karighwaokon ne ne skennen thighshonkwawyh ne Niyoh.

13 Ne ne ji-nahhodenshon yonkwaghtare, yaghden ne dekenh ne onkweh akowennaakon akotdokhatsera ne ayonkwarihhonnyen, ok kenkayen ne Kanikonghriyughstonh enyonkwarihhonnyen; en-yako-nikonghrisake o-nikonghroskon ne karighwaokon ne yenke-neghde no-nikonghroskon.

14 Nok ne jiakwah niyakonnhodenh ne onkweh yaghne thayeye-na ne ji-nahhodenshon ne Rao-nikonra ne Niyoh: ikenh ok thiyorihwenteh ne raonhageh: yahhony deyaweght aharihwayenterhane aoriwa ne kanigonragonh ji yegenhs.

15 Nok raonhha ranikonghrakwe-niyukeh dehhayadoreghtha orighwakwekonh, nok shekonh ne yadchhayadyh yahhonghka thadaonwayadoreghde.

16 Ikenh onghka na yakodokenghsch ne rao-nonghdonnyonghtsera ne Royaner, ne naondon aorihhonnyen? Nok ne onkyonhha yonkwayen ne rao-nonghdonnyonghtsera ne Keristus.

CHAP. III.

Ononda nrah yuynereng! jionh ne ex! aokon.

NEONY n'I-ih, dewadadekenhah, yaghdewakkwe-nyonh nakwawennaraonh ne isekch jiniyoht ne ahsewanigonhragweniyohake, ok ji-niyught ne aesewarighwaneraaxkon, shaden-yawenne ji-niyught nowirasa ne Keristustserakonh.

2 Ononda wahhy kwanondenh, nok yaghden nenne nowaronh: ikenh jiniyore nonwa yaghdesewarharats naese-nikweny, yahhony nonwa shekonh arekho desewakwe-nyonh.

3 Ikenh shekonh wahhy sewarighwaner; xherare: ikenh kenwahhy niyught karonnyon ne sewentyughkwakonh ne yako-noshenh yakaweronskonh, nokhony tyakorighwareh, nokhony sewennikonghroghwihhon, yaghkenh desewarighwaneraaxherare, nokhony desewadekhahhaghkwenhhatye ji-niyught ne onkwehhokon?

4 Ikenh ji-nenwe akare en-yairon enskat, I-ihneh ne *Paul*; nokhare thiskade enjairon I-ihneh ne *Apollos*; yaghkenh ne thaese-nidaxhade?

5 ¶ Onghka kady naah ne *Paul*, onghka ony ne *Apollos*, ne wahhy ne nijihhenghstajyh ro-nonhhakeh wahhy nondawe jidiseweghdaghkonh, shaden-yawenne ne Royaner ne shakowyh ji-niyadeyakonh?

6 I-ih wakyenthonh; *Apollos* wahhaghnekanondenghseke waghoghnekontyeseke; nok Niyoh shakowyh jienwadeghyaron.

7 Etho kady yaghden ony naah raonhha ne ne aoyenthon othe-non, yaghden ony ne raonhha ne ne raghnckanondenghs roghnekontyese; ok Niyoh shakowyh ne en-yondeghyaron.

8 Nonwa raonhha ne ne royenthonh nokhony raonhha ne ne raghnekanondenghs roghnekontyese enskat naah: neony niyadeyakonh t'kakonde en-yeye-na naah ne ne yadeyeyadyh en-yakotyeritshe, ne entyuanenhhawe ne yadeyeyadyh akoyudenghsera.

9 Ikenh ne wahhy shaonkwayudenghserat ne Niyoh: jonhha wahhy ne Niyoh eghjhisewayenthow; jonhha wahhy ne Niyoh eghjhisewanonghsaketskwenny.

10 Ne entyuanenhhawe ji-nonka ne raodenrat ne Niyoh ne ji-nahhoden yonkwawyh niih-neh, ji-niyught ne ratdokha ro-nonghsaketskwenh ne tho-nonghdonhhonh, I-ih dewake-nonghsakensere, nok shekonh oya thikade wathanonghsaseren. Nok kiasa ji-niyadeyankwedakeh radennikonrarenh ji-nenhhayere jienhhadennonghsonny jidenhhayaseren.

11 Asekenh noya thikade aondaye-nonghsakenseraghkwe yahhonghka thayekweny daondaye-nonghsakenseren ne neh nentkanonghsakensere, nencane-eh ne *Yesus Keristus*.

12 Nonwa, doka onghka ok ne onkweh ehhadennonghsonny ne ken-ikenh aondahhanonghsakenseraghkwe, ojinekwar, nendenhens ne kenrakenh karistanoron, nendenhens ne kanenyanoronshon, oyende, ohhonde, oji-naaghrashonhah;

13 Niyadeyongkwedakeh nakoyudenghsera thenwatkwa-
tho: enweghniseradeke t'kakonde thenwaderighwakwathogh-
seron, asekenh wahhy t'kakonde ojire enwadennhodonko;
neony ne ojire t'kakonde en-yakode-nyenden ne niyadeyon-
kwedakeh nakoyudenghsera ne oghnahhoden enkenhhake.

14 Doka onghka ne raoyudenghsera engayendake ewade-
rihohetste ne ne ehhenhadenngonghsaren, t'kakonde enhha-
ye-na enhhotyeritshe:

15 Doka onghka ne raoyudenghsera enwatshaaghdon,
t'kakonde enhhatkaronny enhharonghyaken: nok nyadehha-
yadyh t'kakonde denhhadonkoghde, shekonh ji-niyught ne
ne ojire.

16 ¶ Yaghkenh desewaderyendare jonhha wahhy ne rao-
nonghsadokenghdy ne Niyoh, neony ne eh ne Kanikonra ne
Niyoh satyennyh nise-tserakonh?

17 Doka onghka ok ne onkweh en-yehhetkenghde ne
Niyoh rao-nonghsadokenghdy, raonhha ne Niyoh t'kakonde
enghshakoghdonde; ikenh ne rao-nonghsadokenghdy ne
Niyoh ne na aoskon ncrighwadokenghdy, ne ne eghsewaya-
dareghkonh o-nonghsadokenghdikeh.

18 Kinyoh toghsa onghka ne onkweh radade-nikonrha-
denh; Toka kaneka ne onkweh ne sewentyughkwakonh aa-
ghrerheke katdokha nekenh jiyonghwenjade, kinyoh rodeh-
hak ji-nihhayadodenhak, ne nondakarihhonny aondon ao-ni-
konghrowanha.

19 Asekenh ne kanikonghrowanenghtsera ne kenthoh ji-
yonghwenjade ne na ne kendegehserowanen ne Niyoh-nch:
ikenh eghse niyught jikaghyadon, Raonhha shagodiyenahaty
ne rodinigonhrowanenhse ne ne ro-nonhha raodirenkeny-
eghtseragon.

20 Nokhare, Ne Royaner roderyendare ji-nihho-nennongh-
donnyonghtserodense ne rodinikonghrowanenghse, ne ne yah-
hothe-non dehhodirihhonde naondonghradaghkwe.

21 Ne kady waghonny toghsa onghka ne onkweh aonwa-
nendon ne onkwehhokonkeh: ikenh orighwakwekonh sewa-
wenghk.

22 Aden *Paul*, nedenhens *Apollos*, doka ony *Cephas*, doka ony jiyonghwenjade, doka dens ne ne yonnhe, doka ony kenhheyon, doka denhens ne ne ji-nikarihodense ncnghwাকে, ne denhens ne karighwaokon dawe, akwekonh ise sewa-wenghk;

23 Nokhony jonhha na raowenghk ne Keristus; nokhony ne Keristus na raowenghk ne Niyoh.

CHAP. IV.

Ne ne ji-nahhoden dayeyadoreghthake ne ji-nihhadiyudodense ne radijihhengstajjh.

KINYOH ne ronkweh etho dengshonkwayadoreghthake, ji-niyught ne raojihhenghsta ne Keristus, neony ne ron-watsteristase ne ne okthenhhadikwatho jiyudaghseghdanyon ne Niyoh-neh.

2 Nokhony, akwah na ronwadihonkaryakonh jiro-nats-teristonh, ne ne ronkweh yudetshenryonh thaweghdaghkonh.

3 Nok ne iih akwah wahhy kenniyurighwaah ne ne Da-aghskwayadoreghde nise, doka ony onkweh akoyadoregh-daghxhera; etho orighwiyu, yaghthaakkweny ne I-ih daka-datyadoreghde.

4 Ikenh yahhothe-non Dekyenderyh ne yadekyadyh; shekonh sane yahne thaontkweni ne okthagadohetste: nok raonhha na denhhakyadoreghde ne Royaner.

5 Ne kady wahhonny toghsa othe-non dejadoreght arekho thiyeyuderighwihheh nyareghkwe ne Royaner enrawe, raonhha dejaronh enhhahhewe nenharighodaghsy ne jiyude-righwaghseghdanyon ne jityukaraghs, neony t'kakonde then-waderighwakwatho ne jikonwadirihhonnyennyh ne adon-nheshokon; neony ethone nent'kakonde niyadeyонkwedakeh en-yakoyendane ne adonghraghtsera ne Niyoh-neh.

6 Neony ne ken-ikenh karighwaokon, dewadadekenhah, I-ih wahhy wakyanadonh dekwaderaghdennyh ne ji-nonka ne I-ih neony ne ji-nonka ne *Apollos* ne ne ise sewarihhonnyat; ne akarihhonny aeseaweyendeghdane nonkyonhhatserakonh toghsa onkwehhokonkeh ok aesewennonghdonnyonhheke senhha e-nekenh ji-niyught ne jikaghyadon, ne ne yahrenskat ne ji-nijonh ne ne daesewanakhewaraseke ne wahhetken daesewadadenghniheke.

7 Ikenh onghka yetshighsaanyh ne daesewaderighwadihanyon? neony nahhoden nonwa sayen ne ne yaghdeseayenah? nonwa, doka aesaye-nake, oghnaah akarihhonny aaghtshonwesaghde, ji-niyught ne doka yaghtaeseayenake?

8 Nonwa ne jonhha wesewatyeritshe sesewade-nantshe, nonwa wahhy jisewatshokowah, eghnisewayadanoronse jiniyught nekoraghkowatshon ne yaghr.onkyonhha deyakwayadade; neony ayawen ne Niyoh-neh aaghjhisewayadanoronghste, ne ne onkyonhha ony shadayawenne enskatneh jiaaghshonkwayadanoronghkwe.

9 Ikenh Ikeghre ne na ne Niyoh degshonkwanhaonh ne onkwayadadokenghdy ne oghnakenkeh, ji-niyught jikadokenghjion jiwaghjade ne kenhheyon; ne yonkhiyadonnyadonh ne deyonkwatkaghrondaghkwenh ne jiyonghwenjade, neony nekondironghyakeghro-nonkeh, ony onkwehhokonkeh.

10 Yonkwendeh wahhy ne Keristus raorihhonnyat, nok wahhy sewatdokha ne Keristustserakonh; yonkwayadanetskhah, nok ne jonhha wahhy sewashatste; wahhy sewatkonnyenghskowah, nok ongyonha yonkhikenghronnyane enyonkhiyadaghwaghswen.

11 Shadeyught ne kenghnonweh niwade ne jikaghwistaex yakwadonghkaryax, ony yonkwanyadathenghse, nokhony onkwahhayenghsoskon, nokhony yonkwatkonghrekhon, nokhony yaghdeyonkwayen ji-nonweh nayonkwanakdadokenhake;

12 Neony yonkwadaderonghyakendonh, yonkwadatyudenghstonh nakwah iih akwasnonkeh; waodadenre yonkwahhetkenghdonh, wakhiyadaderighste, yonkhighwishatha, ne yonkwaronghyakendonh;

13 Yonkhirighwaeghstenny, wakwarighwaneken: waonk-hiyonny ji-niyught ne jiyudaraekon ne jiyonghwenjade, neony wahhy yonkwadewennontyonh ne orighwakwekonh shekonh nonwa ne kenghweghniserade.

14 Yaghne dewakhyadonghkwenh ne ken-ikenh karigh-waokon ne naesewadehhen, nok eghniyught jikwanorongh-'kwa kwayenhokonhah, I-ih wakwanikonradade.

15 Ikenh ethosane nen-oyery niwennyaweeghtseraghs-henh deyetshirighwathedennighs ne Keristustserakonh, shekonh kady yahheso dejisewanighshendaonh; ikenh ne Keristustserakonh Yesus I-ih kwadewedon yurihhonny ne orighwadokenghdy.

16 Ne kady wahhonny, Wakwennidenghden, dakwagh-nonderatyesek iih.

17 Ikenh kenkayen aoriwa Yahhiyadennyeghde ne *Ti-motheus*, ne na raonhha rinorongh'waonweh riyenhah, nokhony thaweghdaghkonh ne Royanertserakonh, raonhha t'kakonde enseghjhiseweghyaghraghkwen ne ji-niwakhahhohdense ne ne etho Keristustserakonh, ji-niyught Jikherihhonnyenny ne ji ok nonweh niyadekanonghsadokenghdikeh ony.

18 Nonwa shekonh otyake ne yetshehhode, ji-niyught ne ne Yaghthaonkwa ne isekeh.

19 Nok t'kakondeonweh Yenkwayadorene kenniyurighweshah, dokat ne Royaner enthanonwene, nokhony t'kakondeenwakdokenghse, yaghne dehhodiwenna ne ne ji-nahhoden ro-nennitshehhoghkwenh, ok se toniyocht ne raodishatstehsera.

20 Ikenh ne raoyanertsera ne Niyoh yaghneok nowenna, ok kashatstenghsarakonh.

21 Oghkady nen-yawenne ne jonhha? nekenh endekhawy nokwire nenhenkewe ne isekeh, nendenhens ne adade-noronh, neony ne kanikonrakonh ne yako-nikonghranetskhah?

CHAP. V.

Ne ne yakoderighwaeghstenny ne karighwaneren ne onkweh.

NE wahhy yurihhowanhaonh yurighwakare-nyh, ne ne yutkade eghniyught eghniyawenhonh ne ne kendeghsera ne kanaghkwa ne sewentyughkwakonh, neony neghniyught ne ne kendeghsera yaghdeyeraghk'wa ne kanaghkwa akwah ji-niyught ne yahheghdeyuriwa ne nyaghtakaghseennayendake ne kentyughkwakonh ne nyaghdeyakorighwiuyughstonh, ne ne ao-naghkwaghk'wa ne ro-nihhah.

2 Neony ne sewennitshewenkwonh, neony yaghkenh deyaweght daghnon aesewatshonnyenghkwe ne ne raonhha neghniyhoyerenh ne ken-ikenh ne ne nenroweyennendaonh doka nonna aondon erenh aonwayadenhhawighde ne sewentyughkwakonh:

3 Ikenh I-ih norighwiuyonweh, ji-niyught sane yahtetewese ne oyerondakonh, ne kanikonrakonh itewese eghyekaweyennendaonh, nense dewakyadoreghdaghkwenhonh, ji-niyught ne shaonkwentyughkwah, ne ne ji-niyutyerenh ne raonhha ne neh eghniyhoyerenh ne ken-ikenh kanaghkwa karighwanhightsera;

4 Ne raoghsennakonh ne Eghjhidewayaner Yesus Keristus, ne o-nenh enskatneh ensewatkennisa, neony I-ih ake-nikonra, enke-ne ne raoshattenghsera ne Eghjhidewayaner Yesus Keristus,

5 Ne ne aonsaghjhadako ne Oneghshonghro-nonkeh ne ne jidewadonnhakaryenh ne akowaghronneh, ne ne kanikonra aontyesen aonsakonwayadako ne raodeghniserakonh ne Royaner Yesus.

6 Yaghdeyuanere naneh sadonweshenghtsera. Yaghkenh desewaderyendare ne ne kenniwaah ne yontdenkwaghta ne enwatdenkwaghde osherhakkwekonh?

7 Ne kady wahhonny, desatyadonkoght, natdenkwaghtserakayonh, ne ne aontyesen ase aonsesewadesherhonny ji-niyught nise ne yaghdewatdenkwaghdonh arekho. Ikenh shadeyught ne Keristus yonkwadennyode erenh Ondonkoghde ne na roryughdonh iih onkwariwa:

8 Ne kady waghonny kinyuh dewadye-nawaghst ne jiwa-dennyode, yaghden nenne natdenkwaghtserakayonh, yahhony ne thakenhake ne atdenkwaght ne yakodadidaxhadonh nokhony ne karighwaneraaxhera: nok daghnon ne ne yagh-dewatdenkwaghdonh kanadaroghk ne ne okthiyutkwathonh ne ok yonnonghdonnyonghk'wa aoskon ne t'karighwayery ony tokenghskeonweh.

9 Orighwadokenghdy ne yekwaghyadcnnyh ne isekeh, ne ne toghsa ne shesewentyughkwat aondon ne ne yerighwaneraakhon ne kanaghkwa

10 Shekonh yaghdekakwekonh ne neh ne ok neh kanaghkwa ayerighwaneraakhonhheke ne kenh jiyonghwenjade, nendenhens ne aeseweseke ne yako-noshenh, ne denhens ne yerighwayesaghtha ne kayanerenh, ne denhens ne kayadonnyh konwarighwanekenny; ikenh ethoghkeh nentkakonde densewadonghwenjoghse naesewayakenne ne jiyonghwenjade.

11 Nok nonwa nenwahhy Yekwaghyadonseh ne isekeh ne ne toghsa ne shesewentyughkwah kenhhak, doka onghka ne onkwah ne neh ne aonwanadonghkwe ne yadadekenhah akenhhake ne ne kanaghkwa rarighwaneraax, ne denhens ne yako-noshenh, ne denhens ne kayadonnyh konwarighwanekenny, ne denhens ne rarighwaxhatha, ne denhens ne yeghnekakastha, ne denhens yerighwayesaghtha ne kayanerenh; ne ne eghniyeyadodense yaghden araone ehskahneh tahesewadont.

12 Ikenh oghnenkyere Jienkhejenhhayen ne ro-nonhha ne ne yahheghdeshadiyadare? yaghkenh thadeghsheyadoreghtha ne ro-nonhhakeh wahhy ne ne o-nakonh thc-nadonhonh?

13 Nok ne ne ro-nonhha ne ne atsteh rodiyadontyeghdonh, Niyoh engshakojenhhayen. Ne kady waghonny erenh yetshiyadenhhawight ne sewentyughkwakonh ne ne yakorighwaneraaxkonh nonkwah.

CHAP. VI.

Orighwakeh toghsa ao-nakonny nyadadekenhah, ro-naghden-tyonhhatye ne ji-nonweh dewaderighwaghseronnyatha.

SEWARIGHWANONWAX kenh ne wahhetken onghka ok daesewaderihhodarho ne ji-nijonh, yajaghdendyh ne orighwakeh ohhendondh ne yaghderyuderighwakwarighsyonh, neony yaghden nohhendondh ne jiyuderighwarighsyonh ?

2 Yaghkenh desewaderyendare ne ne yakoderighwakwarighsyonh ne denghshakodiyadoreghde ne jiyonghwenjade ? nok doka ne jiyonghwenjade den-yetshiyadoreghde ne jonhha, yaghkenh shadeyuriwa ne daesewayadoreghde nakwah jiyeyurighwaghsthoonh ji-niyutyerenh ?

3 Yaghkenh desewaderyendare ne ne onkyonhha wahhy denyethiyadoreghde ne kondironghyakeghro-non ? do-onghdeh niyaweda senhha ne karighwaokon ne ne eghkayadareghkonh ne kenthoh jiyakonnhе ?

4 Dokat kishenh aesewayadoreghdaghtserayendake ne karighwaokon eghkayadareghkonh ne kenthoh jiyakonnhе, yetshihhonkaryak ne ne daadiyadoreghde onghka neken yeyakoghsthoonh nakwah ye-noronghk'wa akaweryendakonh ne jiyukarowanenh ne o-nonghsadokenghditserakonh.

5 I-ih wakadady ne ne sewadehhatsera ; Eghkenh niyught yaghkenh kaneka deyederon nayako-nikonghrowanenh ne sewentyughkwakonh ? yaghden, yahhenskat ne ne ayekwene ne dayeyadoreghde ne tninihhokenh ne yadadekenhah ?

6 Nok yadadekenhah ine wahho-ne-nonghdonhhatye jionka norighwakeh, neony ne raodihhendondh ne yaghdethoneghdaghkonn.

7 Ne kady wahhonny kayen kananonh ne sewaderighwadewaghdondh kanhightsera ne sewentyughkwakonh, aoriwa eghyeseweghtha orighwakeh : Oghniyutyerenh eghnaesewayere aeseweghre saethoh yonkhikaronnyh ? oghniyutyerenh aeseweghre saethoh thityonkhiyennonghdons yonkhikonrhadenh ?

8 Yaghdenjy, ise eghnesewayere wesewarighwayadaghdon, neony yetshinikonrhadeny, ony ne ne wahhy sewadadekenhah.

9 Yaghkenh desewaderyendare ne ne yaghdeyakoderigh-wakwarighsyonh t'kakonde yaghthayondaderakwaghse ne raoyanertsera ne Niyoh? Toghsa sewarighwayadaghdonh; yahhony ne kendeghsera ne kanaghkwa, yahhony ne jiok nahhoden aesewarighwanekennihheke, yahhony oya thaaghsatsteriste ne ok ne sanyakonh, yahhony nanyoh tyakothon-wisen yakendorha jiyakonnhe, yahhony thadaesewadaderigh-waxhadanyon ne onkweh nesewayadoden,

10 Yahhony ne ye-nenghskwaghs, yahhony ne yako-nos-henh, yahhony ne yeghnekakastha, yahhony ne yakokengh-radanitskonh, yahhony ne neh ne deyakodaderighwaghkwa-seh nok thiyeyondadeghk'waghs kanikonrhodon jiyonde-weniyughste, yaghthayondewenniyughste ne raoyanertsera ne Niyoh.

11 Neony otyake eghnisewayadodenghne; nok se nenjise-wade-nohharseh, nok waetshiyadaderighste, nenjisewayane-re, ne raoghsennakonh ne Royaner Yesus, neony ne akarihhonny ne Raonigonra ne onkwa-Niyoh.

12 ¶ Orighwakwekjihhonh wahhy yuderighwakwarighsyonh niih-neh, nok orighwakwekjihhonh wahhy yaghthiyekayery: orighwakwekjihhonh wahhy nyuderighwakwarighsyonh iih kewenniyu, nok yaghdeyaweght akathondade ne ne ayonkeshatstenghserakenny onghka kiok.

13 Owaghronhhokon wahhy enwatste no-nekwenda, neony ne o-nekwenda aowenh nowaronh; nok Niyoh t'kakonde shaghdondane dejaronh nethoh, Nonwa ne oyeronda yaghne dekaghshenhennyh ne kanaghkwakarighwaneren, ok tenhnon raowenghk ne Royaner, neony ne Royaner raowenghk ne oyeronda.

14 Neony Niyoh eghnihhoyerenh dejaronh shoketskwenh ne Royaner, nokhony shadenhhayere enseghshonkwaketsko nonkyonhha ne ne raonhha akwah raoshatstenghsera.

15 Yaghkenh desewaderyendare ne ne sewayerondaokon ne wahhy ne raoghsthonderaokon rao-nhaghdaakon ne Keristus? ne kadikenh Denkeghkwe ne raoghsthonderaokon ne Keristus, oni thaonsakteni nagonni ne aonton ne oghsthonderaokon ne kendeghsera ako-nhegthyen ronwadewendeghtha ne Niyoh? Niyoh rorighwaghstenh.

16 Nahhoden! yaghkenh desewaderyendare ne ne raonhha ne neh ne yadehho-natyeghstonh ne nyaghdewadokenghtha kendeghsera sniyerondat naah? igenh wahhi, rawenh, tekenyh sane nok t'kakonde sniwarat enwadon.

17 Nok raonhha ne ne yadehho-natyeghstonh ne Royanerneh ne ky shahhodinikonrat.

18 Sadekwaghs kendeghsera kanaghkwa, karighwaneren. Ji-niyadekarighwaneraaxherakeh ne ne onkweh ne ji-nenyontyere, yaghna dekadare noyeronda; nok raonhha ne ne wahhorighwanhike ne kanaghkwa karighwaneren kendeghsera wahhorighwaneraakden ne raoyerondakeh.

19 Yaghkenh nahhoden! desewaderyendare ne ne sewayeronda ne wahhy ao-nonghsadokenghdy ne Ro-nikonghriyughstonh ne nahhoden iwat souhhatserakonh, ne nahhoden sewayendaonh ne Niyoh-neh, nokhony ne jonhha yaghdesewawenh ji jonnhe?

20 Ikenh wahhy ne jonhha kaghninonh ne ji-niyukarodenh ji-niyukara: ne kady wahhonny eghjhonwesaght ne Niyoh ne jerondakonh, nokhony ne sanikonrakonh, ne wahhy raowenghk ne Niyoh.

CHAP. VII.

Waghshakodady ne jiyako-nyax. Shako-nadonny den-yondadenheghseke toghsa ayerighwanerake kanaghkwa.

NONWA, ne ne ji-niyutyerenh ne karighwaokon ne ne degghskwaghyadonseh: Yuanere naah ne ronkweh ne ne toghsa kenniyaagghshakoyere nako-nheghtyen.

2 Ethosane, tyondonnek, ne ne kendeghsera kanaghkwa karighwaneren, kinyoh niyadehhadyh radiwenniyohak ne ro-ne, nokhony niyadekondyh ne tyunathonwisen kondiwen-niyohhak ne dekonidieron.

3 Kinyoh toghsa shaderighwadekoh ne jiro-nyakonh nakwekonh then-yaweryendiyohhake, nokhony shaden-yawenne ehhone nenkondiyere ne jiyudinyakonh.

4 Ne ne ro-ne yahhaonhha dekadadakwe-niyu ne aoyeron-da, ne ne ro-ne rayadakwe-niyu: nokhony shaden-yawenne ne raonhha yahho-ne dehhayadakweniyu ne raoyeronda, ne ne ro-ne kayadakwe-niyu.

5 Toghsa nokthiyadaesewadadeghk'wa, nyareghkwe yenkahhewe shadense-neryendiyu, ne ne aondon aejatste-nyaron ne ne aese-nendontyeghthake nokhony aejaderennayengh-seke; ne ne enjise-nikwekhene are, ne ne Oneghshonghronon yaghtadayadennakeraghde ne ne ayanikonghrahhetkenghde ne ne sanaghkwakeh ayunetskhane.

6 Nok kenkayen Waktharaghkwenh ne ji-nityonkerigh-wawyh, neony yahheghdetyuyenghdaghkonh ne ji-niwen-nyh.

7 Ikenh Eghaitke-nonwese ne akwekonh nonkwehhokon shadayughdon ji-niyught ne I-ih yadekyadyh: nok niyade-yonkwedakeh odokenhonh yeyutyery yondadawyh Niyoh-neh nityawe-nonh, ne enskat en-yerighwaghserere, neony ogh-nakenkeh thikade ne enjerighwaghserere.

8 Ne kady wahhonny Wakheyenhhaghse ne yaghdeyako-nyakonh nokhony nyunadeghrehonghse, ne na aodiyanerengh-sera ne dokat tyutkonh ne dakondighsnye-ne ji-niyught ne I-ih shadayawen.

9 Nok doka yaghthenkondikwe-nyonhhe neghnayugh-donhhatye, yudinyak nissa: ikenh wahhy senhha yuwey-estonh ne ayunyake ji-niyught ne ne dokat ayodeke.

10 Neony ne ne yudinyakhon ne Wakherihhon, yagh-sane I-ih dekenh, ok se daghnon ne ne Royaner; Toghsa aoyadondy ne jiyunyakonh:

11 Neony, doka aonhha enhhoyadondy ne jiyunyakonh, eghky niyughdonhhak toghsa ky jo-nyak, ne ok daghnon na-onsakarighwaghseronny ne jiyunyakonh: neony toghsa ne raonhha shayadondy ne jiro-nyakonh.

12 Nok shekonh ne otyake I-ih Wakheyadatyase, yaghne Royaner: doka onghkaok ne onkwadadekenhah ao-nyakon nok yaghdetyaweghdaghkonh, nok yaweryendiyughnaonhha nenskatneh aaghniderondake, toghsa shadekwaght naonhha.

13 Neony ne tyuthonwisen yo-nyakonh nok yaghdethaweghdaghkonh, neony doka enhhaweryendiyughseke ne en-skatneh enghniderondake naonhha, toghsa shoyadondyh ne raonhha.

14 Ikenh ne yaghdethaweghdaghkonh ne ro-nyakonh ne na ne ro-ne enhhaonnhakwadako, neony dokat ne ne ro-ne yaghdetyaweghdaghkonh raonhha naah enghronnhakwadako: onwa neken shekonh ne sheyhokonhah yaghten-yakoyanereke, nok nonwa wahhy akoyadadokenghdy naah.

15 Nok doka ne yaghdethaweghdaghkonh erenh en: eghde, erenh nissa isreht. Onkwadadekenhah ne denhens ne onkwadennosenhah yahhe-naghskwa dekenh ne ne eghniyawenghse, nok Niyoh wahhy shonkwaronghyenhha ne jikayanerenh.

16 Ikenh oghnanahhoden saderyendare, O sathonwisen, doka nonnaah ise aonsaghjadako ne dese-nideron? ne denhens do-niyught nise jisaderyendare, O ronkweh, doka nonnaah ise aonsaghsyadako ne dese-nideron?

17 Nok shadeyught ne Niyoh jisakoyakhonny ne ji-niyadeyakonh, shadeyught ne Royaner jishakoronghyenharonh thithokwekdonh, etho kady raghdendyh: Nokhony etho Wakerihowanaghdonh ne ji-niyadekanonghsakeh ne ononghsadokenghdiokon.

18 Nikenkenh kaneka nonkweh ne ayondade-naodonghkwen neghnayughdon aonde-nyendenghston akaghre-nen adatnekoserhon? toghsa eghrayadaran ne yaghdewade-nyendenghstonh kaghre-nen adatnekoserhon, Nikenkenh kaneka niyondad nadonghkwenh ne yaghdewade-nyendenghstonh kaghre-nen adatnekoserhon? toghsa eghrayadaran ne wade-nyendenghstonh kaghre-nen adatnekoserhon.

19 Wade-nyendenghstonh kaghre-nen adatnekoserhon yaghtenne othe-non, nokhony ne yaghdewade-nyendenghstonh ne kaghre-nen adatnekoserhon yahho-ne othe-non, nok dagnon ne ayerighwawakonhhak ne raoghtyawenraghtsera ne Niyoh.

20 Kinyoh niyadeyonkwedakeh kadokenh kenhhak ok ne shakat jinenhoderihondake ji-nonweh thonwanadon.

21 Yaghkenh ise deyesanadonghk'wa ne yesanhase? toghsa sanikonghraxhenh ne akarihthonny; nok dokat ne akarihthonny aonsaghsadadewenniyo-ne, senhha yuweyestonh ne satstonhhak.

22 Ikenh raonhha ne ne thonwanadon ne Royaner-tserakonh, ne ronwanha.e, wahhy shodadeweniyuonh ne Royaner-neh: shadeyught ony raonhha ne ne thonwanadon ne shadadewenniyo, Keristus naah ro-nhase.

23 Kaghninonh na ne jonhha ne ji-niyukara: toghsa ne yesanhasek ne onkwelhokon.

24 Dewadadekenhah, kinyoh niyadeyonkwedakeh ji-nonweh yehhoronghyenhharonh, etho nonweh enskatneh niderondak ne Niyoh.

25 Nonwa, ne ne ji-niyutyerenh ne kondiwinonh, Yaghdehhakerighwawyh ne wenny ne Royaner: shekonh sane I-ih akyadoreghdaghtsera enkheyon, ji-niyught ne ne enskat yakoyendaonhhatye deyakodentshenhcnhhatye ne rao-nidenreghtsera ne Royaner ne naodayakaweghdaghkon.

26 Ne kady wahthonny ikeghre yuyanere nekenhenh ne nonwa jiwatyondonnhakary; Kadon, nethoh yuyanere na ne ronkweh neghnen-yughdonhhatye

27 Sadatnerenh kenh ne jisanyakoh? toghsa sesak ne naonsaghsatnerenghsy, aden kady jisatnerenghsyonh ne jisanyakoh? toghsa sesak naonsesanyake.

28 Ok doka enjisanyake, yaghdesarighwanerenh, nok doka ne kawinonh en-yunyake, yaghdeyurighwaneren: etho sane nenne-eh eghnaawen nok t'kakonde den-yunikonrharen ne owaghronneh; nok enkwanaktharakwen. (Enkwanakdowanaghden.)

29 Nok ne ne kenhenh Kadon, dewadadekenhah, kennaniyurighweshah: jienhho-nadadenron ne ne jirodinyakonh, ji-niyught ne ne yaghtaodinyakon;

30 Neony ne ne yontstarha, shadeyught wahhy ne ne yaghtaontstarhake, neony ro-nonhha ne ne ro-nadonnahhere, shadeyught wahhy ne ne yaghthao-nadonnharake; neony ro-nonhha ne ne radighninonghs, shadeyught wahhy ne yaghtaodiyendake,

31 Neony ro-nonhha ne neh ne rontstha ken-ikenh yonghwenjade, ji-niyught ne ne yaghtayakohhetkenghdon ayakokarewaghdon: ne akarihonny ne ji-niyurihhodenh ne ken-ikenh yonghwenjade wadohhetstane nenneeh.

32 Nok Ke-nonwese ne ne yaghtadaesewade-nikonrharren. Raonhha ne ne yaghdehho-nyakonh ne ky na ranikonrare ne karighwaokon ne ji-nahhodenshon ne Royaner raowenghk, do-naayere ne naondahho-nikonghrayeride ne Royaner:

33 Nok raonhha ne ne ro-nyakonh ne neh ranikonrare ne ji-nahhodenshon ne karighwaokon ne ji-niyutyeranyon ne ji-yonghwenjade, do-nayawen ne naanikonghrayeride ne ro-ne.

34 Niken wahhy dekyat:ihhenh ony ne t'ke-ninihhokenh ne yu-nyakonh nok ne ne yaghdekanaghkwayenderyh. Ne neh yaghdeyunyakonh ne tyuthonwissen ne kanikonrare ne karighwaokon ne ne Royaner-neh, ne ne aondon ne akarihonny oyadadokenghdy ok yadejaronh aoyerondakonh nokhony nao-nikonrakonh: nok naonhha ne ne yunyakonh ne ok kanikonrare ne karighwaokon ne ji-niyutyerenh ne ji-yonghwenjade, do-nayawen ne nao-nikonghrayeride ne ro-ne.

35 Neony ne ken-ikenh Waktharaghkwenh ne ne yadesewayadyh ensewadonghradaghkwe; yaghne Deke-nyende ne nakwanhighden dakwaghskothaghse ne isekeh, nok daghnon kenkayen ne ne ji-nahhoden nakwekonh thiyaweryendi-yught, neony ne ne aondon aesewakwekonhhatyeseke ne Royaner toghsa desewennikonghrakhaghsyonkoh.

36 Nok doka kaneka ne ronkweh ne aennonghdonnyonhheke ne ne eghnaoyerenhhatye ne yadehhayadyh ne yaghde-tharighwayerits naonhhakeh ne ne rao-nonghsakonh kenderon ne nyaghdekanaghkwayenderyh, dokat naonhha nendenyodonkoghdon ne jikajijonthaghkwe ne ji-nennityoyenh, neony deyudonghwenjohhonh neghniyught waderighwisak, thihhen-nonghdonh ji-nenhhayere, yaghna thaarighwanerake: rodinyak nissa onghka iweghre kenhhak.

37 Ethosane nenneeh raonhha ne ne eghdehdatdenghstonh nyaghdeyaweght aonsontkarenghrako ne raweryaghsakonh, royendaonh ne yaghtadaatkary, nok roshatstenghserayen nakwah raonhha ji-nithanonwese, neony eghniyught rodaderighwisaanyh ne raweryaghsakonh ne ne t'kakonde enhhatye-nawaghste ne kawinonh, tharighwayerit.

38 Etho dagnon, raonhha ne ne enhhaghtkawaghse nayunyake dahharighwayeride; nok raonhha ne ne yaghdeh-haghtkawennyh nayunyake senhha ne yuyanere ji-nah-hayere.

39 Ne ne yunyakonh kanerenh naah natdakwarighsyonkeh ji-nenwe enghronnheke ne ro-ne: nok doka naonhha ro-ne enghrenhheye, o-nenh sondadewenniyune enwennonghdon onghka ok enjo-nyake ne ok ne Royanertserakonh.

40 Nok senhha naah yudaghskats naonhha ne doka naonh-ha neghnayughdonhhake, ne ayeayanenhawe ne I-ih agyato-rehtakksera: nok Ikeghre shaden-yawenne ne ne Jiikhawe ne Rao-nikonra ne Niyoh.

CHAP. VIII.

Ne nayondadariste kakon konwadekhonnysa ne kayadonnyh.

NONWA, ji-niyught ne jienwaderihhoryaneron ne ji-nika-rihhodense ne ne eghnonkadyh yejondadaghtkawaghs ne kayadonnyh konwayudenghse, yonkwaderyendare nenneeh akwekonh yonkwanikonrat. Kanikonghrowanenghtsera yudewerengkwenyeh, nok dagnon ne nadade-noronh ne ayondaderihhonnyen, (karighwiyughstaghneh.)

2 Neony doka kaneka ne ronkweh aaghrerheke ji ok nahhoden wakaderyendare, yahhothe-non dehhoderyendare shekonh jidagnon nahhoden aoderyendarake.

3 Nok doka kaneka ne onkweh enhho-noronghk'wake ne Niyoh, ne shaeyadat ne na ne ronwayenderyh.

4 Ne kady wahhonny, ne ne ji-niyutyerenh, ne jiiyex ne ken-ikenh karighwaakon ne ne eghyeyondawighs yonne-yonghs ne ji-nonka konwayudenghse ne kayadonnyh, yonkwaderyendare ne thoikenh kayadonnyh yahhothe-non deyurihhonde ne jiyonghwenjade, neony yaghkaneka oya deka Niyohserayen ne ok enskat.

5 Ikenh ethosane nenne-eh ne ne wahy konwanadongh-k'wa niyohhokon, doka nonkenh karonghyakonh ne denhens onghwenjakeh, (asekenh eso ne niyohhokon, eso ony ne kayanerhokon,)

6 Nok nonkyonhhakeh nese ok enskat ne Niyoh, ne Ranihah, orighwakwekonh raonhhakeh tyuyenghdaghkonh, nokhony raonhhatserakonh nonkyonhha; neony enskat ne Royaner Yesus Keristus, raonhhakeh orighwakwekonh tyuyenghdaghkonh, nokhony raonhha shonkwawenniyu.

7 Ethosane, yaghna ne niyadeyonkwedakeh neghnakani-konghrodenhkake: wahhy otyake, eghniweryendodense ne konwarighwanekenny ne kayadonnyh, ne ne kenghnonweh niwade ne jikaghwistaex iyex ne ji-nahhoden yondawighs ne ji-nonka ne kayadonnyh konwarighwanekenny, ne akaweryendakeh ne yukenhheyonh yuhhetkenhonh naah.

8 Nok ne iyex yaghtayonkwanendonde ne Niyoh-neh yalhony ne thakarihony ne doka aedewake, nenkenh senhha yonkwayanere; yalhony ne doka yaghtayonkwakon, nenkenh senhha waonkwadaraeke.

9 Nok jadade-nikonrarak, onwaneken ehhasayadontyeghde ken-ikenh ji-niyught jisadadewenniyu eghnensayadawen denghsrakwenghdarane ne jikakonghretshakeron akaonhha ne ne akoyadanetskhah.

10 Asekenh doka kaneka ne onkweh en-yesatkaghtotho, ne ne jisani-konghrowanengh, aaghsatyen aaghseke etho o-nonghsadokenghdikeh ne kayadonnyh konwarighwanekenny, yaghtakenh na ne raweryendakeh ne ne royadanetskhah ne aodakaridatste ne ne aarake ne ken-ikenh karighwaokon ne jinahhoden wahhy konwawiyh ne kayadonnyh konwarighwanekenny;

11 Neony ne akarihony kenh ne sanikonghrowanenghtsera ne jadadekenhah ne royadanetskhah aaghrenhheye ikenh raonhha wahhy raoriwa ne Keristus rawenhheyonh?

12 Nok ne o-nenh en-yetshirighwaneraakden ne sewadadekenhah, neony engsherekarewaghde ne jiyakoyadanetskhah ne akaweryendakeh, wesewarighwanerake ne Keristusneh.

13 Ne kady wahhony, doka wakon ne akarihony nakyadadekenhah daoderenghsaronkwaghse, yaghhoghtao-waghroden Thaonsakeke ji-nenwe en-yonghwenjadeke, onwaneken I-ih enkerihony nakyadadekenhah denhhode-renghsaronkwen.

CHAP. IX.

Waghshako-nadonhaghse ne raodewenniyughtsera.

YAGHKENH I-ih dekenh ne kaderighwaghnodons norighwadokenghdy? yaghkenh Dekadadewenniyu? yaghkenh I-ih dehhikenh ne Yesus Keristus Eghjhidewayaner? yaghkenh iih dewakyudenghsera nise ne Royaner-neh.

2 Doka yahhy thenkenhhake ne rarighwaghnodonghs norighwadokenghdy, ne ji-nonka notyakeshon shekonh thadesewanikonrake ne I-ih he isekeh: ikenh wahhy dekaghneghdoghrarakonh ne akwawenghk ne kayadadokenghditserakonh wahhy jonhha ne Royanertserakonh.

3 Sekherighwaserakwenny ne ne aonke-nikonghrisake ne ne ken-ikenh;

4 Yaghkenh deyonkwashatstenghserayen naedewake nokhony naedewaghnekira

5 Yaghkenh deyonkwashatstenghserayen ne ne ayethinontshineghson nonkwadennosenhhah, ony deyakwenderon, shadayawenne notyake ne rodiyadadokenghdy, nokhony jiniyught ne rondadekenhah ne Royaner, neony *Cephas*?

6 Aden I-ih ok nok *Barnabas*, yaghkenh deyonkwashatstenghserayen ne ne ayakyaghtkawe nekayudenghsera?

7 Onghka enhhaderighwaghdentyade naderiyughsera ne okthikawenniyu katkeh ne ne raonhha raokaryaxhera? onghka yuyenthonh ne o-nenhhare, nok yaghtaarak ne o-nenh enwaghyanyonden ne etho? ne denhens onghka konwadinondenghs ne deyudinakarondonhah, neony yaghta-ayeke ne aodinonda ne deyudinakarondonhah?

8 Wakwaghrory kenh ne ken-ikenh karighwaokon jiniyught ne onkweh? aden yaghne deyawenh norighwakeh ne shakat wahhy?

9 Ikenh eghse niyught jikaghyadon ne raorighwakeh ne Oses, Toghsa se-nyonghsterenk ne deyudinakares ne ne enkondiradaseron enkondinenghstaronko. Denhhaghsnye-ne kenh ne Niyoh ne deyudinakares?

10 Aden rawenh yekakwekonh I onkwarihhonnyat? I onkwarihwashon, karighwadokenghjionh, kaghyadon wahhy ne ken-ikenh: raonhha ne ne rahheghdakarhathoghs ne ne karharatsheriyyuh jienhhahheghdakarhatho: neony raonhha ne ne rentskaex ne nayawen jikarharatsheriyyuh ehhayadane ne jidehdonghwenjonyh.

11 Doka en-yonkwayenthon ne isekeh ne kanikonghrakweniyu ne karighwaokon, yurighhowanenh kenh doka en-yakwayenthonko ne sanoshaghtsera karighwaokon?

12 Doka notyakeshon ne en-yerighwenhhawake ne ken-ikenh kashatstenghsera ne nayasaghdorarake, yaghkenh senhha nonkyonhha? Ethosane nenne-eh yaghne deyonkwatstaghkwenh ken-ikenh kashatstenghsera; nok yonkwaronghyakenh orighwakwekonh, onwaneken en-yakwayudatshe ne raorighwadokenghdy ne Keristus.

13 Yaghkenh desewaderyendare, ro-nonhha wahhy ne radijihhenghstajyh aoriwa norighwadokenghdiokon ne ronnonheghkonh ne karighwaokon ne o-nonghsadokenghdi-keh? neony ro-nonhha ne ne ye-nonghne ne jiyeyadaraghstha rononnhehkon ne karihwa-ogon ne jiyeyadaraghstha?

14 Shadekade ony ne ji-nihhoyerenh ne Royaner shakoyadarakwenh, ne ne ro-nonhha ne ronderighwaghnodonghs ne orighwadokenghdy ne ne ehnaontawe ji enhonnonnheke ne orighwadokenghdy.

15 Nok yahhothe-non ne Dewakatstonh ne ken-ikenh karighwaokon: yahhony Dewakyadon ne ken-ikenh karighwaokon ne ne etho nayonkyere ony niih-neh: ikenh yuwey-estonh wahhy nakihheye, daghnon ne ne kaneka ne onkweh akokon ayonkonny ayonkenhghiden aonkwaghdonse nakonwesenghtsera.

16 Ikenh sane I-ih kerighwaghnodonghs ne orighwadokenghdy, yahhothe-non Dewakyeen ne nakonwesaghde: ikenh ne ji-nadeyudonghwenjohhonh iih-neh naah karighwayendaghkonh; odokenhonh orighwiyu, kanikonghranonghwakdenghsera naah ne iih-neh ne doka yaghtthenkerihhowanaghdane norighwadokenghdy.

17 Asekenh doka akwah eghnenkyere ji-neken nikarih-hodenh ne nyaghtaondonkenisko, En-yonkwadonghraghseronse: nok doka yahheghdedewake-nikonghrodenh, rake-rihhontyeghdennyh ne Niyoh ne nenkaderighwaghdensityade norighwadokenghdy.

18 Oghnahhoden en-yonkwadonghraghseronse ne ethone? Orighwiyuonweh nethoh, ne o-nenh Enkerighwaghnodon ne orighwadokenghdy, onghdony Akkweny ne ne yaghtayukarodane ne raorighwadokenghdy ne Keristus, ne ne Yaghtaakhetkenghde norighwadokenghdy ne ne' iih akeshats-tenghsera.

19 Ikenh sane Skadadewenniyu akwekonh nonkwehho-konkeh, shekonh sane Eghniwakadatyerenh yadekyadyh ne akwekonh ako-nhatsera enkenhake ne ne aondon senhha eso daonsakadentsha.

20 Neony *Jews*-akakeh Dewakadonnionh ji-niyught ne *Jews*-aka; ne ne aondon daonsakheyadentsha ne *Jews*-aka; ro-nonhhakeh ne ne eghyeyadareghkwenh orighwakeh. jiniyught nehhakyadaraghkwe ne orighwakeh, ne ne aondon Daonsakheyadentsha ne ne orighwakeh yeyadareghkwenh;

21 Ro-nonhhakeh ne ne yahheghdehhadiyadare norighwakeh, jiniyught ne yahho-niih eghthakyadarake orighwakeh, (yaghdekenh ne yaghtakyadarake norighwakeh ne Niyohneh nonkadyh, nok se eghkyadare ne raorighwakeh ne Keristus,) ne ne aondon Daonsakheyadentsha ne ne yahheghdeyeyadare norighwakeh.

22 Ji-nonka nakoyadanetskhah Ehho-ni niyught wakya-danetskhah, ne ne aondon Daonsakheyadentsha ne akoyadanetskhah: ne Yonkyadisaaghdonh norighwakwekjihhonh jini-nonka nonkwedakwekonh, ne ne Aonkkwenyon nyaonderighwisaaghdde aonsakheyadako otyake.

23 Neony kenkayen eghniwakyerenh ne ne orighwadokenghdy aoriwa, ne ne aondon Ehhaonsakyadarane aonsak-yendarane ne ethoh aedeweşeke.

24 ¶ Yaghkenh desewaderyendare, ne ne ro-nonhha ne radidakhe-nontye ne dehhorerotye, tehonrahtats akwekonh, nok wahhy enskat en-yeye-na ne jiniyukara natshennonnyaghtsera? Dejaraghdad kady, o ne ne aondon ne daonse-sewadentsha.

25 Neony niyadeyonkwedakeh ne ne ayondatsteronghse ne ne ayonderighwatkweny wahhy ske-nenhah ok thiyurighwakwekonh. Nonwa, eghnihhodiyyerengh ne ji-nonka ne yakorrhorokdonh ne wahhetkense ne deyakodentshon, nok nonkyonhha yaghdewahhetkense yaghdeyurye-nenhonh.

26 Ne kady wahhonny eghniyught Jidenkaraghdade, jiniyught ne yahhorighwiyu thakenhhake; eghniyught Jikaderiyughs, yahheghdeyught jiniyught ne ne enskat ne aye-konghrekhonhheke ne jiyudeweraratyese:

27 Nok Wakadennikonraren nakyeronda, eghdakeh enkenhhake, neony eghniyenhhenhawe ne naondakerighwayeride; onwaneken ne ken-ikenh akde enwakyadontyeghde, ne ji-onenh Kheyaderighwaghnodonyh ne thihhadideshon, I-ih yadekyadyh wahhy aonkyadondako, (ne Niyoh-neh.)

CHAP. X.

*Ne ne Jews-aka jiyeyadarase, ne ne onkyonhha onkwade-ny-
endenghtsera.*

SHADKADE, dewadadekenhah, Yaghdewakeryendiyughs ne ne yaghtaesewaderyendarake ne jiniyutyerengh ne ken-ikenh akwekonh yethinihhokonkenhha eghnihhodiyyadawenhonh o-nakonh ro-nadonhonh ne otshada, nokhony akwekonh eghdehho-nadonkoghdonh ne kanyadarekghkowah;

2 Neony wahhy akwekonh ne ro-natnekoseraghdonh raonhhakeh ne Oses otshadakonh ony kanyadarakonh;

3 Neony akwekonh rodikonh ne shakat ne kakon nekankonghraonweh

4 Nokhony akwekonh ne rodighnekighradonh ne shakat sondon ne kanikonghraonweh, ne rodighnekighradonh: (ikenh ne rodighnekighradaghkwenh ne na ne kanikonghrakwe-niyu Otstenra ne na enhhodighnonderatyeghde, neony ne na ne Keristus Notstenra:)

5 Nok eso yakonh ne nyaghdehhonwanikonghrayeridonh ne Niyoh; ikenh ne ne ronwadikarhathonh ronwadikaronnyh ne karhakongh-tseraxhengh-tserakonh.

6 Nonwa, ne ken-ikenh karighwaokon ne ne onkyonhha wahhy endidewadennakeraghde, ne ne aedewaweyennendane aedewarighwayeride ne ne yaghtaedewanosha ne aedewakaghdatyeghde ne karighwaxhenghskwehokon, ji-niyawenhonh ne ro-nonhha ony rodinoshonh.

7 Toghsa ony kayadonuyh sewarighwayennihhek, jiegh-nihhodiyaerenh otyake ase eghniyught jikaghyadon, Ne nonkwehhokon eghdakeh en-yondedarayen watyontskaon nokhony waeghnekira, nok donsayedane sayekennyadane ne nayontkaghrisheronny ayondonweshen kayadaghdonghtsera.

8 Toghsa kinyoh dewarighwanerak ne kendeughsera kanaghkwa, ji-niyught notyake ne ro-nonhha ne rodirighwaneren, neony eghdakeh waeyendane ne seweghniserat dewaghsenh aghsenh yawenre niwennyaweeghtseraghsenh.

9 Toghsa ony eghhidewanakonnyh ne Keristus, ji-niyught ne ro-natyakeshon jieghniyawenhonh ronwanakonnyh, ony oghnyareokon wahho-naghdonde.

10 Toghsa ony jadonryadeght, ji-niyught ne ro-natyakeshon eghniyught ro-nadonryadeghdonh, neony ronwanaghdondonh ne shako-naghdontha.

11 Nonwa, orighwakwekjihonh ne ken-ikenh ne ji-niyawenhonh ne ro-nonhhakeh ne tyako-nakeraghdanyon: neony rodighyadon ne ne aonsayonkhiyeghyaghraghkwen, en-yakwadennharatshe ne jideyudonghwenjokdanihon dawe.

12 Ne wahhonny, kinyoh raonhha ne ne rennonghdonnyon irade, ranikonrarak onwa neken enhayatyen.

13 Yaghaenne ne dewadennakeraghdonh desewaye-nah nok neghniyught ji-niyught na neh shadakadeke thikawen-niyu ne onkweh; nok Niyoh naah thaweghdaghkonh, raonhha enhhakweny nyaghkayese thaaghsadon ne ne daesadennakeraghde issy nonka ne ji-nisewakwe-nyonh; nok sanonghweghtsera enke-ne ne dewadadennakeraghdonkeh shadayawen arenh aonsaweghde ne ne aonsesewanyakenne, ne ne aondon aesewakweny ne aesewaderighwenhhawa.

14 Ne kady wahhonny, kwanorongh'wa dewadadekenhah, sadekwaghs ne kayadonnyh konwarighwanekenny.

15 Wakewenninekenne ji-nonka nyako-nikonghrowanenghse nonkwehhokon: dese-niyadoreght ne ji-nahhoden Kadon;

16 Ne ne cup ne kayadaderightsera ne wahhy dewaya-dade righstha, yaghkenh nedekenh ne yonkwaye-nah dekarighwakehhadont ne ne rao-nekwenghsa ne Keristus? ne kanadaroghk ne wahhy ne deyonkwayakhon, yaghkenh ne dekenh ne yonkwaye-nah dekarighwakehhadont ne raoye-ronda ne Keristus?

17 Ikenh yonkwatkade wahhy, shaonkwanadarat, nol'ho-ny skayerondat: ikenh wahhy yedewakwekonh yonkwayen-daraonh yonkwaye-nah netho-ikenh skanadarat.

18 Jatkaghtoh ne *Israel*-aka ne radighnonderatye ne owaronh. Yaghkenh ro-nonhha dekenh ne rodikonh ne ne eghyaonsahho-nadadaghtkawen ne jironwenneyonghk'wa ne Niyoh jiyeyadaraghstha, rodiyendaronh rodiye-nah ne jiyeyadaraghstha?

19 Oghnahhoden Enkiron nethone? ne ne kayadonnyh the-nonkenh nenneeh? ne denhens ne choikenh ne ji-nahhoden ne yeyakoghtkaon ne nakonwenneyonghkwe ne ne kayadonnyh the-nonkenh nenneeh?

20 Nok kadon, ne ne ken-ikenh karighwaokon ne ji-nahhoden ne nyaghdehhodirighwiyughstonh eghyeshondadaghtkawaghs o-neghshonghro-nonkeh, yaghden ne Niyohneh; yagh n'I-ih deke-nonwese ne yadaesewatyeghste aeseweseke ne o-neghshonghro-nonhokon.

21 Yaghthaesewakweny aesewaghnekira ne rao-cup ne Royanor neony ne rao-cup ne o-neghshonghro-non: yaghthaesewakweny aonesesewayendarane ehhaonsesewayadarane ne raodekhwaraghk ne Royaner, neony ne raodekhwaraghk ne o-neghshonghro-non.

22 Eghkenh niyonkwayerenh eghjhidewanakonnyh ne Royaner ne kanoshaghtsera? senhha kenh iih yonkwayadaghniron ji-niyught ne raonhha?

23 Orighwakwekjihhonn tyurighwayerionh niih-neh, nok yabhakwekonh dewakeweyenstase: orighwakwekjihhonn tyurighwayerionh niih-neh, nok orighwakwekonh yaghsenhha deyakoderihhonnyennyh nayako-nikonghrayendane.

24 Toghsa onghka nonkweh aaghresake ne raowenghk, nok niyadeyakonh thiyedeshon akotshokowaghsera.

25 Jiok nahhoden enwadenghninonhhake ne jiyondewaghraghninondaghk'wa, neky enghseke, yaghtaaaghserighwanendon aaghserighwisake ne enryendakeh akarihonny:

26 Asekenh ne onghwenja Royaner naah raowenghk, nokhony ne ji-nikanaanoh ji-nikayen.

27 Doka kaneka ne ji-nihhadyh ne nyaghdetho-neghdaghkonn aondayessenonke ne jiwadennyode kakon, nok eghweseweghde; ji ok nahhoden en-yesakeghronhaghse ne sahhendoh sek, yaghtaaghserighwanendon aaghserighwisake enryendakeh akarihhonny.

28 Nok doka kaneka nonkweh en-yesenhhaghse, ne ne ken-ikenh konwawyh etho yejakoghtkawenh ne nonka ne kayadonnyh konwarighwanekennighs, toghsa sek ne ne raonhha aarihhonny ne ne yanadonny neony enryendakeh akarihhonny: asekenh ne onghwenja ne na ne Royaner raowenghk neony ne ji-nikanaanoh ji-nikayen.

29 Kadon, yahhise, deseryenda, nok wahhy thiyede: nahhoden karihhonny ne jikewenniyu ne dayongyatorehte ne thiyonkwedadeshon akaweryendakeh.

30 Asekenh doka I-ih akarihhonny ne raodenrat ehhaonsakyadarane aonsakyendarane, nahhoden akarihhonny wahhetken Ayonkewennarane ne akarihhonny ne ji-nahhoden Wahhiyadonren?

31 Ne kady wahhonny dokat ensewake ne denhens ensewaghnekira, ne denhens nok thikawenniyu ji-naesewatyere, akwekonh eghnase-niyer ji-nonka ne raonwesenghtsera ne Niyoh.

32 Toghsa yasheyonh ne deyuderenghsaronkwaght, yahhony ne *Jews*-akakeh, yahhony ne ji-nonka ne yaghdehhodirighwiyughstonh, yahhony ne rao-nonghsadokenghdikeh ne Niyoh:

33 Shaden-yawenne Jienkhinikonghrayeride akwekonh nonkwehhokon ne ji-niyadekariwakeh, yaghdekesax ne yadekyadyh akadonghradaghkwe, ok daghnon ne ne eso yakonh ayondonghradaghkwe, ne ne aontyesen aonsahhodiadako jiatkaronnyat.

CHAP. XI.

Raonhha waghshakorighwaeghsten aoriwa otyughkwadokenghdy.

EGHNIYUGHDONHHAK dakwaghnonderatyesek, shadekade ji-niyught ne I-ih ne Keristus.

2 Nonwa I-ih Wakwanendon, dewadadekenhah, kenkayen dakweghyarak norighrighwakwekjihhonh, neony sewarighwenhhawe ne ji-niyenyuderighwinonh ne ji-nikwennyh, ji-niyught jikwarihhontyenseh ne isekéh.

3 Nok ke-nonwese ne ken-ikenh naesewaderyendarake, ne kayadakweniyu ne ji-niyadeyakonh ne wahhy ne Keristus; neony ne na rayadakweniyu ne rajin ne tyuthonwisen, neony ne rayadakwe-niyu ne Keristus ne na ne Niyoh.

4 Niyadeyakonh yakoderennayen nedenhens ohhendonh yehhariwakenghs, roderhorokyh ne rao-nonjineh, yaghdeh-hokonyenghst ne rao-nonjineh.

5 Nok ji-niyadekondyh ne tyunathonwisen ne ne yonaderennayen nedenhens nyakariwaken nisy naoriwadyh ne nao-nonjineh aoderhoroxhy, yaghdeyukonyenghst; ikenh se shadeyught ji-niyught ne doka aonhha ayutkenkaron.

6 Ikenh doka ne tyuthonwisen ne ne yaghdeyuderhorokyh, kinyoh shadeyawen watkenkar; nok doka ne tyuthonwisen enwadehhenghseke naonde-nonghkare nedenhens naontkenkare, kiasa yude-rhoronhhak.

7 Ikenh ne ronkwéh; jiorighwiyu, yaghdeyuweyenstonh naaderhoroke ne rao-nonjineh, aoriwa nethoh ji-niyught jiraonhha thodadennakeraghdonh ony raonwesenghtsera ne Niyoh: nok ne tyuthonwisen ne na raonwesenghtsera ne ronkwéh.

8 Ikenh ne ronkwéh yaghwahhy ako-nheghtyenkeh de-thoyenghdaghkonh; nok ne tyuthonwisen ejinneh wahhy tyuyenghdaghkonh.

9 Yahhony eghdeyawenhonh ne ronkwéh ne akonheghtyen ayondatsshenhenny; nok ne tyuthonwisen raowenghk ne ronkwéh.

10 Ikenh kenkayen aoriwa yuweyestonh ne tyuthonwisen nayushatstenghserayendake nao-nonjineh, enkarihhonny ne kondironghyakeghro-non.

11 Ethosane nenneeh, yaghwahhy ony ne ronkweh dehaonhhaah yaghdeyeyadare nako-nheghtyen, yahhony deyaweght ne tyuthonwisen nokthiyaonhhaah yaghne rajin, ne Royaner-tserakonh.

12 Ikenh ji-niyawenhonh ne tyuthonwisen kaji-nadakonh tyuyenghdaghkonh, shadeyawenhonh ehho-ne niyught ne rajin shadeyught ako-nheghtyenkeh o-nenneeh: nok orighwakwekjihhonh Niyohneh.

13 Jadatjenhhayen ne jonhhatserakonh; Wahhy yuweyestonh kenh ne ne tyuthonwisen naonderennayen Niyohneh nyaghdeyuderhoroxhonh?

14 Yaghhkenh dekenh shadayughdon eghniyughthonweh shaoyerat ne sarihhonnyenny, ne ne doka ne ronkweh rononghkwiseres, wahhy yudehhat ne raonhhakeh?

15 Nok doka ne tyuthonwisen yunonghkwiseres, ne wahhy naonsenghtsera ne raonhhakeh: asekenh wahhy konwawyh nao-nonghkwis nen-yuderhorokdaghkwen.

16 Nok doka onghka ne onkweh aadadodaghsy aarighwanonghwehhake aatsheroade, yahheghdeyonkwarihhodenh, yahhony ne kentyughkwadokenghdikeh ne Niyoh.

17 Nonwa, ne ken-ikenh ne Wakwarihhowanaghden ne isekeh, yaghtakwanendon, ne ne enskatneh ensewatkennisa yaghsenhha thayuyanerenne ok sehha okhekenh wakada-raeke.

18 Ikenh, ne jityutyerenghdonh nakwekonh, ne o-nenh enskatneh ensewatkennisa ne o-nonghsadokenghdikeh, Wakaronke ne ne ethoh desewennikonghrakhaghsyonkwenh ne sewentyughkwakonh; yukwenghraron ony Dakeghdaghkwe.

19 Ikenh nethoh t'kakonde wahhy ony wesewarighwayadaghdon akde niyeseWANIKONGHRENHHAH ne sewentyughkwakonh, ne ne ro-nonhha ne ne yakodatyadake-nhenh yakodatyudenghse ne naontyesen hake ayakotsheronyaghkwenhthon thayutkwathon ne sewentyughkwakonh.

20 Ne o-nenh enskatneh ensewatkennisa, skanakdatneh, yaghwahhy ne dekenh ne ken-ikenh naesewake ne Royaner yukaraghskhah kakon.

21 Anekenh ne jideyontskaon niyadeyakonh wahhadiye-na dontyereughde ji-niyught notyake raowenghk ne yukaraghs-khah kakon: nok shayadat radonghkaryax, nok ne shayadat ro-nonghwaraghdonhonh.

22 Atskwyh! yaghkenh desewanonghsodon ne ne aese-waeke nokhony ehhaesewaghnekira? aden sewakenghradany ne raotyughkwadokenghdy ne Niyoh, neony ennhonwana-dehhade ne ne yaghdehhodiyen? Oghnahhoden Enkwenh-haghse nisekeh? Enkwanendon-kenh neghnen-yughdon? yaghna thakwanendon.

23 Ikenh I-ih wahhy wakye-nah ne Royanerneh ne shakat ne ji-nahhoden Kwarihhontyenseh ne isekeh, ne wahhy ne Royaner Yesus, ne shonghsondat ne ne shathonwani-konghraseren, wathanadaraghkwe:

24 Neony, ne o-nenh shahhadonren, wathayakhon, neony wahhenron, Je-nah, sek; ne na nakyeronda, ne na watyetshiyakhonhaghse; eghnajer ken-ikenh ne nenghskweghyaghraghk'wake.

25 Oghnakenkeh ne shakat ji-nahhayere shatyawenne watraghkwe ne cup, ne o-nenh shihhok'wendaonh, wahhenron, Ne ne ken-ikenh cup ne na ne ase dekawennendaonh ne nake-nekwenghsakonh: ken-ikenh eghnase-niyer, ji-nen-yutkadeke ensewaghnekira, dakweghyarak ne iih.

26 Ji-nen-yutkadeke ensewake ne ken-ikenh kanadaroghk, neony ensewaghnekira ken-ikenh cup, eghnase-niyer jodaghsyh ne Royaner rawenhheyat ji-nenwe dentre.

27 Ne kady wahhonny, onghkakioh ne t'kakonde en-yeke ne ken-ikenh kanadaroghk, neony en-yeghnekira ne Royaner rao-cup, yaghdeyakodadeweyennendaonh, t'kakondane wahhy en-yakoderighwaeghsten en-yakotkarayenaghse ne raoyeronda nokhony ne rao-nekwenghsa ne Royaner.

28 Nok kinyuh radatkaen-yonh nyadehhayadyh, neony ethone kinyuh irak nethoh kanadaroghk, nokhony raghneki-rah nethoh cup.

29 Ikenh ne raonhha ne ne enrake nokhony ennhaghnekira ne ne yaghdehhodadeweyennendaonh, nok enrake ennhaghnekira ony ennhadejirenghdaghkwe ne yadehhayadyh, ne nyaghdehhoderhoroxhennyh ne Royaner raoyeronda.

30 Asekenh kenkayen tyuriwa yutkade nen-yakoyadanetskhah nokhony kanradarinese ne sewentyughkwakonh, nokhony eso nyakowendaonh.

31 Ikenh doka daedewadatyadoreghde nyadedewayadighshon, yahho-ni thadayonkhiyadoreghde.

32 Nok ne o-nenh en-yonkhijenhhayen, enghshonkwaghrwaghdde ne Royaner, ne ne yaghtaaghshonkwadaghrkwaghswn ne Royaner yaake-neghdde ne jiyonghwenjade

33 Ne wahhonny, dewadadekenhah, ne o-nenh enskatneh endewatkennisa ne ne daedewatskaonh, sewenderondak shaden-yawen notyake.

34 Neony doka onghka ok ne ronkweh radonghkaryax, ji-nisa tho-nonghsode dethatskaonh: ne ne toghsa ne yadese-wayeghst aesewatkennisa ji-nonka nadewendeghtsera. Nok notyake Ensekhoweyennendase ensekhekwadakwen ne o-nenh Tentke.

CHAP. XII.

Ne kanikonghraonweh yondadawighs ne ji-niyeyuderighwionh.

NONWA ne ne ji-niyutyerenh ne kanikonghraonweh yondadawighs, dewadadekenhah, yaghdeke-nonwese nyaghtaesewaderyendarake.

2 Sewaderyendare nenne-eh jonhha neghniyughdonne yaghdesewarighwiyughstonh, eghsewayadaghrkwidonh ji-nonkadyh ne ken-ikenh yaghdewadady kayadonnyh ne konwarighwanekenny ne shatyawenne ne waetshiyaghsharine.

3 Ne kady wahhonny Wakwanikonghrayendaghdn, yaghrneken onghka ne onkweh ne deyakoghraghraghrkwenh ne Kanikonghrakeh ne Niyoh ronwayesaghdonh ne Yesus ronwadewendeghdonh: nokhony yaghonghka ne onkweh thayekweny ayairon ne neken ne Yesus ne na ne Royaner, nok daghnon ne enkarihonny ne Ronikonghrayughstonh.

4 Nonwa, kenwahhy niyught dekyatdihhanyonghs jiyondadawighs nok se ok ne Shakanikonrat.

5 Nok sane dekontdihhanyon ne ji-niyonkhiyerase, nok se ok ne Shakayaner-tserat.

6 Neony wahhy dekadihhanyon thadeyakoyudenghserade-nyon ne ji-niyontyerha, nok se wahhy ok ne shaka-Niyoh-serat ne ne royudenhonh orighwakwekonh orighwakwekjih-honh.

7 Nok ne thontkwatho ne Kanikoura ne wahhy yondadyh ne niyadeyakonh ne ne ayondonghradaghkwe yenwat-kwekde notyake.

8 Ikenh nense enskat yondadawyh ne Kanikonghrakch ne nowenna ne kanikonghrowanenghtsera; nare thiskade, ne nowenna ne natdokhatsera ok se ne Shakanikonrat;

9 Nare thiskade, teweghdaghkonh ok se ne Shakanikonrat; nare thiskade, ne ne yondadawighs ne ne jakojendaghk'wa ok se ne Shakanikonrat:

10 Nare thiskade, ne kayudenghsera ne ne yutyanade-nyon; nare thiskade, ne ne ohhendondh yehhadiriwakenghs; nare thiskade, ne ne waeken wakoderhoroxhen thakotkwa-those ne kanikonra; nare thiskade, ne ne dekyatdihhanyon eso ji-niyadeyewennodenshon; nare thiskade, ne ne niyade-yakaonghwenjakeh ne nyondewennakaradats.

11 Nok ken-ikenh thikayudenghserakwekonh ne ji-nikayudenhonh wahhy enskat nokhony yadekayadyh ne ok Skanikonrat, yudekhaghsyonkwenh ne ne niyadeyakonh adenno-serhenh enwadoghwiha thenhennonghdon.

12 ¶ Asekenh wahhy ji-niyught ne skayerondat, nok yude-nhaghdakade, nok skayerondat akwekonh ne jityun-haghdondon, anyuh eso, ne ne skayerondat; eghkady o-ne-niyught ne Keristus.

12 Ikenh wahhy Skanikonghratneh yedewakwek ne yonk-highnekoseraghdondh ethoh skayerondat, doka kishenh *Jews*-aka nedewayadoden nedenhens nyaghdeyonkwarighwiyugh-stonh, doka kishenh dewanerenh nedenhens dewadadewen-niyu; neony wahhy eghniyawenhonh akwekonh ne kagh-senhennyh ne nen-yeghnekira ji-nonweh ne Skanikonrat.

14 Ikenh noyeronda yaghna enskat ok thadeyughsthon-dere, ok eso naah.

15 Doka noghsida enkenron, Aoriwa yagh I-ih osnonghsa dekenh, yaghky Dekyadare noyerondakeh; wahhy, ne wah-honny, yaghkenghne oyerondakeh dekayadareghkwenh?

16 Neony doka nohhonghda aakenron, Aoriwa jiyagh I-ih dekenh nokara, Yahheghdekyadare oyerondakeh; wahhy, ne kadikenh enkarihonny, yahheghdekyadare oyerondakeh?

17 Doka noyerondakwekonh okara akenhhake, ka kady neghnonweh niyonghronkatha? dokat akwekjihhonh ne enyakothondeke kane-nonweh, kanenonweh nayakoswaghseke?

18 Nok nonwa Niyoh wahhy wadeghshakoghsthonderonnyon ne niyadeyakonh ne oyerondakeh, eghniyught wahhy wahhaweryendiyu.

19 Neony doka yehhadikwekonh shodighsthonderat ak-enhhake, ka kady ne oyeronda?

20 Nok nouwa eso wahhy dehhodighsthonderon, nok shekonh ne ok skayerondat.

21 Neony ne okara yaghtakakweny ayawenhhaghse ne osnonghsa, Yaghtadekon-yadonghwenjonyh; yahhony neh, o-nonjyh thayawenhhaghse nosida, yaghtadekon-yadonghwenjonyh.

22 Yaghden, senhha eso ne ken-ikenh yunhaghdondonnyon ne oyerondakeh, ne ne ayenghre senhha oghsorha yukenhheyon, wahhy deyudonghwenjohhonh o-nenne-eh;

23 Neony tho-ikenh deyughsthonderonnyon ne oyerondakeh, ne ne yakweghre yughsthoonh natkonnyenghtsera, etho ken-ikenh eghyeyonkwatyonh eso yaontkawe natkonnyenghtsera; ne ne jiyaghdeyonkwaweyenstonh eso yaontkadade ne yuweyenstonse.

24 Ikenh ne ji-nonkadyh yonkwayadaweyenstonh yaghse ne thadeyudonghwenjohhonh, nok se Niyoh roghniradonh ne oyeronda yadehhoyeghstonh, shonkwaghtkawennyh ne senhha aontkadade ne yutkonnyenghst ne ne ji-nonka deyudonghwenjohhonh ji-nityodokde:

25 Ne neh eghnonweh ne ne toghsa daondekhaghshyonko dakarine nakorighwiyughstaghk noyerondakonh; nok ne nthoh ji-nadeyughsthonderon ne shakat enskat jienkondinikonrarake.

26 Neony doka kishenh skaghsthoonderitserat kayese enwadon enkaronghyaken, yenwatkwekde akwekonh enkondironghyaken ji-nadeyughsthonderon; nendenhens ne skaghsthoonderitserat en-yutkonnyenghstane, yenkarighwendaghde akwekonh ji-nadeyughsthonderon shadenkondonnharen.

27 Nonwa wahhy jonhha shoyeronda ne Keristus, neony ne raoghsthondera nakwah yadesewayadihshon.

28 ¶ Neony Niyoh roweyennendaonh rokwadakwenh eghdeghshakodenghstonh otyake ne o-nonghsadokenghdi-keh; tyutyerenghdonh, ne ne rodiyadadokenghdy ronderigh-waghnodonghs; teke-nihhadont, ne neh ohhendonh yehhadi-riwakenghs rontrorighs; aghsenhhadont, ne ne shakodirih-honnyenny; oghnakenkeh nenne-eh, yutyanadanyon: ne ne shako-nawighs ne enjakojende, shakodiyenawase, koragh-kowatshon, ne jiniyadeyewennodenshon.

29 Akwekonh kenh rodiyadadokenghdy? akwekonh kenh yehhonorighs nissy naoriwadyh? akwekonh kenh shakodirihonnyenny? akwekonh kenh rodiyudenyon yutyanadenyon?

30 Rodiyen kenh akwekonh ne ronwanawyh ne nenjakojende? eghkenh nihhodiyyerenh akwekonh kenh niyadehha-diwennodenshon? eghkenh nihhodiyyerenh akwekonh kenh rondewennakaradats?

31 Nok she-noshah kasennikonghrakondaghk ne naonhah yuyanere jiyondadawighs: nok shekonh Enkwanadonhaghse senhha eso jiyuthahhatkonnyenghst.

CHAP. XIII.

Akwekonh ne ne yondadawighs, nok yaghdekayadare nadade-noronh yaghky othe-non deyurihhonde.

ETHOSANE ne Waktharaghkwenh ne jiniyewennodense ne onkwehhokon neony ne karonghyakeghronon, nok yaghdewakyen nadade-noronh, Anonkyadawen jiniyught ne nayuristakarheke, ne denhens ayakaondawedon yuwennothiye jiyurakaghre.

2 Nokhony ethosane Yonkerighwawyh nissy naoriwadyh yenkatrory, neony kaghronkha akwekonh ne jiniyudaghsaghdanyon nokhony akwekonh naghronkhatsera; ethosane Ikhawe akwekonh ne teweghdaghkonh, ne ne aondon Aakweweny erenh aakhawighde ne yunonde-nyon, neony yaghdewakyen nadade-noronh, yahlhothe-non n'I-ih.

3 Ony ethosane Kheyeridih akwekonh nakwadaghl:wen-nya ne ne en-yakoghdaghde ne yakodenghde-nyon, ony ethosane Kheyawyh nakyeronda ne-nayontshaaghde, neony yaghdewakyeen nadade-noronh, yaghwahhy othe-non thakadonghradaghkwe.

4 Adade-noronh wabhonnise shadewennikonghkaryenh, nok tyurighwayery yuyanere naah; adade-noronh yaghwahhy deyunoshat, adade-noronh yaghden nok thayutkwathon thayutshaghnighdon thaondonnonghdon yadekayadyh, yaghe deyetshehhode,

5 Yaghwahhy deyaweght wahhetken ji-naontyere nyadekayadyh jideyekanere, yahhony dewesax nyadekayadyh aowenghk, yaghwahhy dewatyeseenh ne ayunakonnyade, yaghe dewennonghdonnyon ne wahhetken;

6 Yaghdewadonnahhere ne sewaderighwadewaghdonh karighwaneren, nok kenkayen daghnon wadonnahhere ne ji-nonweh ne tokenghskeonweh

7 Wadahkatstat orighwakwekonh, tewehtahkon orighwakwekonh, ne nayawen ne ji-nadeyudonghwenjohhonh orighwakwekonh, tyutkonh en-yurighwadatyeh orighwakwekonh.

8 Adade-noronh yaghnondenonh thiyadakarighwarine aondokden: nok yaghdokadenh ne nohhendonh atroryaghtsera, denhhodirighwarise enwadokden; doka nonkenh ne ne niyadewennakeh ehhenhho-nattatshe; doka nonkenh eghnonweh jikanikonghrowanenghtsera, t'kakonde ehho-naghdonse kathonghdeh.

9 Ikenh yonkwaderyendare yukwenghraron, nokhony yedewariwakenghs yukwenghraron;

10 Nok ne o-nenh ne ne ji-nahhoden norighwiyu yenkayeride ne na onwe, ethone ne ne ji-nahhoden nokthiyukwenghraron t'kakonde waderighwaghdonghsere nenne-eh.

11 Ne ne ethone Shikexhaah, Wakthare anyuh exhaah, Yahhonke-nikonghrayendane anyuh exhaah, jiony Ken-nonghdonnyon anyuh exhaah; nok, ji o-nenh eghnaawen Wakadeghyaron, erenh Wakhawighde ne ji-niyugt ne exhaokonhah ne ji-nikarihodense.

12 Ikenh nonwa waakwaken yatyuhhetste owisakonh tyukaraghs aghsadakonh; nok ethone daghnon endewadat-konghsaken; nonwa Nenhonkwaderyendarane yukwengh-raron; nok ethone daghnon t'kakonde Enwakaderyenda-rane shaden-yawenne ony ji-niyught Jiyonkyenderyh.

13 Nok nonwa yekenderon ne teweghdaghkonh, ne yurharats, adade-noronh, ken-ikenh aghsenh; ok ne æonhhaah karihhowanenh ji-neken nikarihhdense ne ne adade-noronh.

CHAP. XIV.

Ohhendonh yehhonorighs radinendonghs eghnighshakodiyerese.

SERIGHWAGHSER ne adade-noronh, neony ne serighwanekkah ne kanikonghraonweh ne adadawy; nok senhha yuweyenstonh ne jonhha aondon yaesewariwaken.

2 Asekenh ne raonhha ne ne radadighs ne yaghdeyewennayenderyh ne ji-nihhawennodenh yaghky na onkwehho-konkeh dehhoghthare, ok daghnon Niyohneh: ikenh yahhonghka nonkweh dehhonwaghronkaonh, ethosane kani-konrakonh jiwahhadady yutyanade-nyon naah.

3 Nok raonhha ne ne yehhariwakenghs nissy naoriwadyh, radadighs nonkwehhokonkeh ne ne ayakotyeghstennihhatye ayutye-nionhhatye ony ayeghrejaron, nokhony ayakaonri-shendane.

4 Raonhha ne ne radadighs ne ne yaghdeyewennayenderyh, wahhoyeghstonhhatye yadehhayadyh; nok neh yehhariwakenghs, rotye-nighdonhhatye shakorihhonnyenny ne kentuyghkwadokenghdy.

5 Ke-nonwese ne ne sewakwekonh ne aesewadatyade ne jiniyadeyewennodenshon; senhha yuweyenstonh ne jonhha yaesewariwaken: ikenh rarihhowanenh naah ne ne yehhariwakenghs senhha ji-niyught ne ne radadighs ne niyadeyewennakeh, ne ok daghnon ne radewennakaradat, ne neh ne akarihhonny ne kentuyghkwadokenghdy ayakoye-nahhatye ayakotyeghstennihhatye ayakodaderihhonnyennihhatye.

6 Atskwih, dewadadekenhah, doka nonkenh entke ne ise-keh ne Enkadatyade ne niyadeyewennakeh, oghnahhoden Enkon-yatshennonnyaden, nyare ne Enkon-yadatyaden nise-keh kaok entkayenghdaghkwe ne ji-nihhorighwadadonh Niyohneh, nedenhens kanikonghrowanenghtserakeh, nedenhens nissy naoriwadyh yakatrory, nedenhens ne ji-nikarihho- denh norighwakeh?

7 Neony jiokhony thiyugt ne ji-niyadekariwakeh yagh- deyonnhe ne aonderakareraghste, ka ok nikayen doka oh- houroda nedenhens karenghsodaryh yonderennodaghk'wa, nyareghkwe denkwadewennakhaghshyonko denkwadewenna- dihhanyon ne jien-yurakareghre, oghnen-yawenne nen-yako- dokenghse oghnahhoden naah ne jienyuhhonrodakareghre nedenhens ne jienwaderennoden ne karenghs daryh?

8 Asekenh doka ne kahhonrawatskowah ne jien-ya-kaon yahhorighwiyu jien-yurakareghre, onghka ne en-yondenrha- rade ne yadeyeyadyh ne jiyonderiyughsere?

9 Eghkady niyugt wahhy ne jonhha, nyareghkwe ense- waweyennendane enjisewaroroke ne ensewadatyade ne se- wennaghsonneh ne owennaokon watyesenhhah ne ne ayon- ronke, oghkady nen-yawenne nen-yakoderyendarane ne ji- nahhoden sewadatyadonh? ikenh jonhha wahhy eghyese- waghthare etho jiyaodatyese.

10 Jiwahhy niyugt, neghnayughdon, eso yewennakeh ne jiyonghwenjade, neony yaghkady kaneka nyaghtakarake nyaghtayughronkadon ne ji-nikendon.

11 Ne kady wahhonny, doka Yaghtenwakaderyendarake ne ji-nikendon ne ji-niyewennodenh, raonhhakeh Enkayada- rake ne ne radatyatha yaghdehhadokenghtha, neony raonhha ne ne radadighs t'lakonde yaghdehhadokenghtha niih-neh.

12 Shaden-yawenne wahhy ne jonhha, kadokenghjionh wahhy desewadonghwenjonyh ne kanikonghraonweh aon- dayetshiyon, sewesak ne ne aondon yadaejadohhetste ji-nonka ne naejatyeghstennihhatye aeseniweyendeghdaonhhatye ne o-nonghsadokenghdikeh.

13 Ne kady wahhonny kinyuh raonhha ne ne radadighs ne ne yaghdeyewennayenderyh, raderennayenh nisa ne naon- don nok thaakwatho.

14 Aseken doka Akaderennayen ne ne yaghdeyewenna-yenderyh ake-nikonrase onderennayen; nok nakwaghronkatsera yaghdeyunenhhondaonh naah

15 Oghkady neken niyught? Enkaderennayen wahhy enke-ne ne kanikonra, nokhony wahhy Enkaderennayen enke-ne nakwaghronkhatsera shaden-yawenne, Denkeriwaghkwe enke-ne ne kanikonra, nokhony Denkeriwaghkwe nakwaronkatsera shaden-yawenne.

16 Kendenhens kayen, ne o-nenh enghsyadaderighste enke-ne ne kanikonra, oghnen-yawenne ne raonhha ne ne aatyenawaghste yunakdode wahhy ne ne yaghdeyondaderihhonnnyenyh nayairon Awent ne jienghsheyadonren, degghskaghraghjhionh yaghdehho-nikonghrayendaonh ji-nahhoden sadonnyon?

17 Ikenh akwah orighwiyu daghseryghwayeride jiwaghtshadonren, nok ne thihhade yaghnenne dehhorihhowanaghdonh naodaderihhonnnyenny.

18 Dehhinonghweradon niyawenh ake Niyoh ne Ji-niyadekewennakeh senhha eso ne ji-niyught ne yesewakwekonh:

19 Nok shekonh senhha eso Ke-nonwese nakadady wisk nityudadyh ne kentyughkwadokenghdikeh ne ji-nikaghronkhatsero denh, ne ne I-ih akewenna ne naondon aakherihhonnnyen notyake shadayawenne, aniyught oery niwennyaweghtseraghshenh nowennaokon ne ne yaghdeyewennayenderyh.

20 Dewadad-kenhah, toghsa sewaxhaokonhah kenhak ne aghronkhatserakonh: ethosane, ji-nonka ne yerighwayesaghdanyon sewaxhaokonhah eghkenhhak, nok neh aghronkhatserakonh jadonkwedisonhonhhah nenneh.

21 Atdakwarighsyonghtserakonh wahhy kaghyadon, Kenwahhy onkwewhhokon ne thikade ji-niyewennodense nokhony thikaghskwendade Enkadatyade ne ken-ikenh onkwewhho-konkeh: nok shekonh yaghtayonkwadahhonghsadatshe, radon ne Royaner.

22 Ne kady wahhonny ne niyadeyewennakeh ne wahhy wade-nyendenghstaghkwenh, yaghnenne ro-nonhhakeh dekenh ne tho-neghdaghkonh, nok daghnon ro-nonhhakeh ne ne yaghdetho-neghdaghkonh: nok ne ne yeyeriwakenghs nissy naoriwadyh yaghe shahhodyughkwah dekenh ne ro-nonhha ne ne yaghdetho-neghdaghkonh, ok daghnon ro-nonhha ne ne tho-neghdaghkonh.

23 Dokat, nonkenh ne akarihonny ne akwekonh ne kent-yughkwadokenghdy enskatneh nonweh nayontkennisa, nok akwekonh ayondady ne niyadeyewennakeh, neony etho enyonwe notyake ne ne yaghdedayokaderihhonnyennyh, ne denhens ne yaghdetho-neghdaghkonh, yahlonghdekenh thannoniron desewennonghwarawenry wahhy?

24 Nok doka akwekonh yeyeriwakenghs nissy naoriwadyh, neony etho dare shayadat ne ne yaghdethaweghdaghkonh, nedenhens shayadat ne ne yaghdeshaghyadonghserayenderyh, enhharihondere-ne akwekjihhonh, dehhonwayadoreghtha akwekonh:

25 Neony ethowahhy niyught yudaghseghdanyon ne raweryaneh ok na thenwatkwatho; etho-niyught, eghdakeh enhhayadayendane yenhakonghsayendane, t'kakonde enihorighwaneken ne Niyoh, neony denhharighware-nyade ne ne Niyoh waghyatyenhaghse nise-tserakonh ne ne tokenghskeonweh.

26 ¶ Dewadadekenhah, do-niyught nethone? ne o-nenh enskatneh ensewatkennisa, niyadejonh ensewayendake norenadokenghdy, ensewayendake jiok orighwadokenghdy, ensewayendake ony ne niyadeyewennakeh, ensewayendake ne en-yakodokaden Niyohneh entkayenghdaghkwe, ensewayendake nyondewennakaradats. Kinyuh orighwakwekjihhonh eghniyawen ji-nonka yeyurihhowanhaonh.

27 Doka onghka ne onkweh ne enhhadatyade ne yaghdewennayenderyh, eghky niyughdonhhak jitekenyh, nedenhens yaghden nisy nonweh ne aghsenh, neony ne nenne-eh jeyadatshon jien-yondady; neony shayadat radewennakaradat.

28 Nok doka yaghdekayen naadewennakaradade, kiasa thadehhadodat ne kent-yughkwadokenghdikeh; kinyuh yadehhayadyh yehhadadyh ne Niyohneh.

29 Kinyuh ne ne yehhadiriwakenghs nisy naoriwadyh ne rondadyh tekenyh aghsenh denhens, nok notyakeshon deye-yadoreght.

30 Doka jiok nahhoden ne thaotkwathose yadaodinengh-rokden ne ne eghyederon, ne dewatyerenght nyare thadehdadodot.

31 Wahhy sewawenniyu nakwekonh yajatroryh nisy naoriwadyh enskatshon endewaderade, ne ne akwekonh aondon ayondaderilhonyen ayeweyendeghdane, neony onghdony akwekonh aonsayakaonrishendane.

32 Neony ne raodinikonghraakon ne rodiyadadokenghdy wahhy rondadewenniyu ne rodiyadadokenghdikeh.

33 Ikenh ne Niyoh yaghne dethodaghsawe ne daanikon-rharen, ne ok daghnon ne kayanerenh, ji-niyught nakwekjihhoh no-nonghsadokenghdiokon ne jityakoyadadokenghdiokon.

34 Kennen-yughdonhake ne sewanheghtyensera thadeyunadodek no-nonghsadokenghdikeh: ikenh yaghwahhy dekonwadirighwawyh no-nonhhakeh ne nakondady; nok wahhy konwennenyh eghdakeh jadadonnihhak jathondatshek, eghwahhy niyught ony jiyudadyh natakwarighsyonghtsera.

35 Nok doka othe-non enkondiweyendeghdane, kinyuh o-nonhha ronwadirighwanendonghs ne dekontideron etho aodinonghsakonh; asekenh wahhy ao-nadehhenghsera nehakondadyh o-nonghsadokenghdikeh.

36 Oghnahhoden! isekeh kenh tyuyenghdaghkonh ne raowenna ne Niyoh? aden neken isekeh ok daweghde?

37 Doka onghka ok ne onkweh enhhadadennonghdonny-onhheke ne royadadokenghdy akenhhake, ne denhens ne kanikonghraonweh, kinyuh rathondat rarihondere-n radcrighwenhhawa ne ken-ikenh karighwaokon ne ne yekwaghyadonnyh ne isekeh ne wahhy ne raoghtyawenraghtsera ne Royaner.

38 Nok doka onghka ok ne onkweh ok thiyakorighwendeh, rorighwendehhak nisa.

39 Ne kady waghonny, dewadadekenhah, she-nosshah ne ne yeweriwakenghs nisy naoriwadyh, neony toghsa sheghyaghtyawenrats ne nayondady ne niyadeyewennakeh.

40 Kinyuh orighwakwekonh eghniyawen watyerit, neony ewatsheronnyaghkwenthon.

CHAP. XV.

Ne ne ji-niyawenhonh ji-niyutyerenh jist'otketskawenh ne ne rohhahhonngyh ne jienjidewatketskwaghseke.

SENNHA issy nonweh, dewadadekenhah I-ih wakwarih-howanaghden nisekeh ne orighwadokenghdy ne wahhy Wakwaderighwaghnodonse ne isekeh, ne wahhy shakat ne ji-nahhoden sewayenah, neony ji-nonweh nonwa nisewaken-nyade;

2 Ne wahhy shakat enjisewayadako, dokat tyutkonh en-seweghyarake ne ji-nahhoden Kwaderighwaghnodonse ne isekeh, dokat yaghden okkhoriwakon jiendiseweghdaghkwe.

3 Asekenh I-ih yekwaghtkawennyh nisekeh, ne tyutyere-nghdonh nakwekonh, ne ne ji-nahhoden Wakyenah ne shakat, ne ne ji-niyawenhonh ne Keristus jirawenhheyonh yurihhonnyh ne onkwarighwaneraaxhera, eghwahhy nika-wennodenh ne kaghyadonghseradokenghdy;

4 Neony ronwayadat wahhy, nokhony shotketskwenh wahhy are ne aghsenhhadont niweghniseakehhadond, egh-wahhy nikawennodenh ne kaghyadonghseradokenghdy;

5 Neony shonsalhhoken ne *Cephas*, ethoghkeh nenne-neh tekenyh shadire:

6 Oghnakenkeh nenne, nensahhonwaken issy nonweh ne wisk nadewennyawe nonkwadadekenhah enskatneh: radiya-dadokenh ne kentuyghkowanenh ne wahho-nadenre ne ne kenthoh yakarighwihhewe, nok otyake yakoyatye-nenhonh yakodaonh.

7 Oghnakenkeh nenne, nishokenh ne *James*: ethoghkeh nenradikwekonh ne rodiyadadokenghdy.

8 Neony ne jiyahhondokden nen-akwekonh sahnonwaken iih ony shatyawen, ji-niyught ne enskatneh onkweh ayako-donhonh yahthakayerine yahhonderighwihhewe.

9 Ikenh I-ih wahhy yewakaghsthonh ne rodiyadadokengh-diokon, yahheghdeyuriwa ne nayonke-nadonghkwe royada-dokenghdy, aoriwa Jikhe-nikonghraronghyakendonh ne rao-tyughkwadokenghdy ne Niyoh.

10 Nok ne ne raodenrat ne Niyoh wakakweny ne I-ih Jinyadodenh; neony rao-nidenrechtsera, ne ne jinahhoden yonkerihhontyenseh niih-neh, yahkayese deyudonhoh; nok eso Wakadatyudenghste yakyeride wakatye-nighde jiniyught nakwekonh; yagh Idekenh, nok dagnon ne ne raodenrat ne Niyoh ne yake-nikwekonhhatyese.

11 Ne kady wahnony, doka kishenh I-ih kendenhens kayen ne ro-nonhha, ne wahhy kwaderighwaghnodony, nokhony ne wahhy deseweghdaghkwe.

12 Nonwa, doka ne ayonderighwaghnodonghkwe ne Keristus jishotketskwenh ne kenhheyatneh, oghnahhoden ensewenren otyake ne sewentyughkwakonh ne ne yondonnyon yaghtaonsayontketsko ne yakawenhheyonghseron?

13 Nok doka yaghtenjonketskewaghseke ne kenhheyatneh, yaghky na ne Keristus deshotketskwenh.

14 Nok doka ne Keristus yaghtenshotketskwen, nenky na nonkwaderighwaghnodoughtsera okhoriwakon, nokhony jidiseghdaghkonh okhoriwakon o-nenneh.

15 Etho orighwiyu, neony yonkhirihwatshenri o-nowen jironwarighwaghniradyh ne Niyoh; aoriwa jiook thakwakwatho wakwarilhodaghsy waghshakwarighwaghnuratshe ne Niyoh ne ne shoketskwenh ne Keristus; doka kady yaghtenshotketskwen, doka eghnen-yawenhoh yaghky na thaonsayontketsko nyakawenhheyonh.

16 Asekenh doka ne yakawenhheyonghseron yaghtaonsayontketsko, yaghky ky na ne Keristus ony deshotketskwenh;

17 Neony doka ne Keristus yaghtenshotketskwen, okhoriwakon ky na jidiseweghdaghkonh; shekonh kady na sewarighwaneraaxherakonh sewayadondarheonh.

18 Ne kady ro-nonhha shaden-yawenne ne ne rodiyatyenenhoh rodidaonh ne Keristustserakonh ne neh ne ro-nenhheyadonh.

19 Doka ne kenthoh ne jityonnhe ne ok ayonkwayendake dayonkwadonghwenjony nayawen Keristustserakonh, onkyonhha ky na tyonkwedakwekonh yeyudohhetstonh jiyonkwendenh.

20 Nok nonwa wahhy Keristus shotketskwenh jirawenhheyonghne, eghkady tyuyanondaonh ne tyutyerenghdonh yunenhhondaonh ne ro-nonhha ne ne ro-nawendaonh.

21 Ikenh ji-nahhe ne ji-nityawenhonh ne onkweh akoriwa jiyaihheyonghse, onkweh ony akoriwa jienjontketskaghwaghske ne yakawenhheyonghseron.

22 Ikenh ne ji-nityawenhonh ne Adonh akwekonh eght-yunenhhondaonh ne kenhheyon, shadeyawenhonh kady ne Keristusneh t'kakonde akwekonh enjidewadonnhede.

23 Nok ji-niyadeyonkwedakeh yadeyeyadyh en-yondatkwadakwen: Keristus wahhy tyutyerenghdonh yunenhhondaonh: oderihhokdaghkwenkeh ne ne Keristusneh yeyadareghkwenh ne ne ji-nadentre.

24 Ethoghkeh enwawe enwaderihhokden, ne o-nenh t'kakonde enhhoghtkawen ne kayanertsera Niyohneh, ne na ne Ranihhah; ne o-nenh akwekonh eghdakeh enhhody neyerighwakwarighsyonghskwe, nokhony akwekonh ne wenna-keraghdanyon ony kashatstenghsera.

25 Ikenh raonhha wahhy yadekakonde enthennonghdon, nyare akwekonh denghshakoraghsidakenseraghkwe ne ronwaghswe nghse.

26 Ne ne odokdaghkwenkeh ne ronwaghswe nghse ne ne t'kakondane raghdondane ne na ne kenhheyon.

27 Ikenh nense orighwakwekjihhonh dehhoraghsidakenseraghkwenh. Nok ne o-nenh enhhenron, Orighwakwekjihhonh wahhy nenroghdoghrarakonh, ne wahhy thiyutkwathonh ne ne jiyaghdeh hayadare ne raonhha ne ne eghnihhoyerenh orighwakwekjihhonh raonhhakeh shorighwayendaghkwenh.

28 Neony ne o-nenh orighwakwekonh endewadenghnonwenhhonghste endewadagsthoghde ne raonhhakeh, ethone nentkakonh ne Ronwayen eghse ony ne raonhha nen-yawen eghdakeh enhadon ne raonhhakeh ne ne orighwakwekonh yehhorihhontyenseh raonhha, ne akarihhonny ne Niyoh orighwakwekonh aarighwakwekhe-ne.

29 Oghkady shekonh nenhhadiyere, nense wahhy ne ronatkoseraghdonh aoriwa ne yakawenhheyonghseron, doka yaghtthenjontketskohhe ne yakawenhheyonghseron? oghnahhoden kady aoriwa jiyontnekoseraghs aoriwa ne jikenheyon.

30 Neony oghnaah eghyakwakennyade ji-nonweh nade-yuderyentarah ji-nikonh enkaghwistaeke

31 I-ih enkerihhodaghsy enkerighwaghniirade ne sewadonnahhere ne ji-nahhoden wakyen ne Keristustserakonh Yesus Eghjhidewayaner, niyadeweghniserakeh Kiheyonghse.

32 Doka ne aakkaghdatyeghde ne ji-niyakorihhodenh ne onkwehhokon Wakaderiyughsyonh ne kondiryu ethoh *Ephesus*, oghnahhoden enkadonghradaghkwe doka ne yakawenhheyonghseron yaghtaonsayontketsko? Kinyuh dedewatskaonh nokhony dewaghnikirah: ikenh en-yurhenne endewenhheye.

33 Toghsa yesanikonrhadenh; Wahhetken karighwaneraaxhera dekonwanaktyakyh wakahhetkenghde nyuuanere ji-nikarihhodense.

34 Sewayeh ji-nonka ne yuderighwakwarighsyonh, toghsa ony serighwanerak, ikenh otyake wahhy yaghdeyako-nikonghrayendaonh ne Niyohneh: ne Waktharaghkwenh ne ken-ikenh ji-nonka ne sewadehenghsera.

35 Nok otyake nonkweh en-yairon, Oghnen-yawenne jienjontketsko ne yakowendaonh? neony oghnikayerondoden enjakotstonhhatye jienjonwe?

36 Sendeh? ne ne ji-nahhoden waghstyentho yaghwahhy deyudonnhedonh onderako wakenhheye.

37 Neony ne ne ji-nahhoden waghstyenthoghde, yaghwahhy ne desayenthoghdonh ne ne t'kakonde ne shakayerondat akenhhake, nok dagnon kanenhhodenh, ne kady ne yeskawenniyu ennekery yaondon, nedenhens ne otyake ne oya nakanenhhoden:

38 Nok Niyoh wahhy rayerondawih ne ne raonhha jinitaweryendiyughs, ne ne ji-niyadekancnhhakeh aonhha aoyeronda.

39 Owaghronhhokon yaghwahhy shaowarat dekenh: nok enskat ok nenne ji-nikawaghrodenh ne onkwehhokon, thiyuwarade nenne ne katshe-nen kondiryu, thikade ony ne kenjonghkhokon, thikade ony ne jidenhokonhah.

40 Etho o-ne niyught kayen ne jinityught ne karonghyakonh noyerondaokon, neony noyerondaokon eghkareghkwenh onghwenjakeh: nok ne onwesenghtsera ne jinityught ne karonghyakonh enskat naah, neony ne onwesenghtsera ne ne onghwenjakeh kareghkwenh thikade penneeh.

41 Wahhy jonwesenghtserat ok ne jikaraghkware, nokhare thijonwesenghtserade ne neghnida, nokhare thijonwesenghtserade ne ne ojistoghkhokon; asekenh ne skajistoghkwat dekyatdihhenh ne thikade nojistoghk ne onwesenghtsera.

42 Eghkady ony niyught jienjontketsko ne yakowendaonh: ne wahhy eghnonweh nikayenthonh ji-nonweh niyutkenhonh, wahhy enjontketsko ji-nonka ne yahteyohetkenhonh:

43 Wahhy eghnonweh nikayenthonh ji-nonweh ne yaghdedyutkonnyenghst: ne wahhy enskaketskwaghde ne onwesenghtsera: ne wahhy eghkayenthonh ne jiyukenhheyonh; ne wahhy enskaketskwaghde ne kashatstenghserakonh:

44 Ne wahhy kayenthonh ne ji-niyonnhodenh noyeronda; ne wahhy enjoketskwaghde ne kanikonghraonweh noyeronda. Kayen wahhy ne ji-niyonnhodenh noyeronda, nokhony kayen ne kanikonghraonweh noyeronda.

45 Neony eghse niyught jikaghyadon, Ne ne thodonkwedatyerenghdonh Adonh ronwayadison ne yonnhonweh ne raodonnhets, ne oghnaken Adonh ne ronwayadisaghdonh ne yonnhonweh kanikonra.

46 Ethosane nenne niyawenhonh yaghne detyutyerenghdonh nethoh ne kanikonghraonweh, nok ne ne ji-niyonnhodenh, (ne jiyonghwenjade,) nok neh oghnakenkeh ne na ne kanikonghrakwe-niyu,

47 Ne ne thodonkwedatyerenghdonh onghwenja wahhy jithoderakwenh, onghwenjaonweh; nok teke-nihhadont ne onkweh ne na ne Royaner karonghyakeh thoyenghdaghkwenh.

48 Ase ne na nonghwenjaonweh, eghkady ony ne ro-nonhaha niyught wahhy onghwenjaonweh: nok ne kenkayen ne na ne karonghyakeghro-non, eghkady ony niyught ne ro-nonhaha wahhy karonghyakeghro-non.

49 Nok ji-niyught jionkweh yonkwadonhonh onghwenjaonweh ji-nidewayadodenh, onkyonhaha ony t'kakonde yenjidewahhewe ne ji-nidewayadodenh ne jitkaronghyade.

50 ¶ Nonwa ne ken-ikenh ne Ji-nikadon, dewadadekenhah, thoikenh owaronh ony o-nekwenghsa yaghna deyaweght yaondaweyade ne raoyanertserakonh ne Niyoh; yahhony ne yuhhetkenhonh thiyaondaweyade ne yahteyohetkenhonh.

51 Jatthaghtoh Wakwanadonhaghse ne jiniyudaghseghdanyon; yaghwahhy akwekonh thayonkwendawe, nok daghnon akwekonh dejidewadonnhadenyh.

52 Jiniyughsnore, jideyontkaghkwirox, ne jiorihhokdaghkwenkeh kahhonrawats; (ikenh ne kahhonrawatskowah enyurakareghre;) neony ne yakowendaonh enjontketsko yaghtaonsonhhetkenne, neony denjidewadonnhadeny.

53 Ikenh ne ken-ikenh kahhetkenghdonh yadekakonde na enjakoderighwaghrako, nokhony ne ken-ikenh ne jiniyeyadodense ne onkweh yadckakonde ne enjidewatste ne yaghdakenhheyonghse.

54 Ne kady ne o-nenh ken-ikenh kahhetkenghdonh t'kakonde enjakoyendane enjakoderighwaghrako, neony ne ken-ikenh onkweh kenhheyonghse yakoyen t'kakonde enjakoyendane ne enjakoyendane ne yaghtonwendonh thiyaonsakenhheye, ethone nentkakonde yenw derighwihhewe ethone. yawen ne jiniwadon ne wahhy kaghyadon, Kenhheyon wahhy wakotyadaghneghkwane aoshennyeghtserakonh.

55 O kenhheyon! ka-nenh sheyennirerhohharhoghs? O jiyeyadadaryon ka-nenh sashennyeghtsera?

56 Ne ne en-yaihheye jiyuderighwaneren ne na nyakoirerhohharhoghs; neony ne jiyushatstenghserayen ne karighwaneren ne na naghtyawenraghtsera.

57 Nok Dehhinonghweradonghs ne Niyoh ne jishonkwawyh ne endewadenshennyade, ne rorihhonnyh Eghjhidewayaner Yesus Keristus.

58 Ne wahhonny, kwanoronghk'wa dewadadekenhah, sewarighwaghnironhhak, sewarighwadokenhhak, toghsa sarakoh, tyutkonhhonweh ne sawenniyuhhak ne raoyudenghserakonh ne Royaner; ne aoriwa wahhy sewaderyendare ne ne jinenjadaderonghyakende yaghkayese thaondon ne Royanertserakonh.

CHAP. XVI.

Waghshakoghrejaron ro-nonhha ne ne ashakodiyadake-nha nedeyudonghwenjohhonh nonkwadadekenhah ne ethoh Jerusalelem.

NONWA, ne ne ji-niyutyerenh ne jienwatwistaroroke aoriwa ne ne yakorighwiyughstonh, ji-niyught Jikherighwawyh ne no-nonghsadokenghdikeh ne *Galatia*-neh, shadenyawen ehho-nise nasewayer.

2 Ne ne jityudeghniseratyerenghdonh ne jinnadekyadendadere akwah ji-niyadejonh jadeweyendonh noghwista ne jonhakeh, ji-niyught ne Niyoh jisakotshennonnyadenny, yaghkady othe-non thaonsesewaroghroxheke ne o-nenh Dentke.

3 Neony, ne o-nenh Dentke, onghkakiok ne jonhha ne t'kakonde enghrodaghsy ne sewaghyadonghsera, ro-nonhha Yenkeh-nhane ne yenhhadihhewe ji-nikonh desewady noghwista etho *Jerusalem*-neh.

4 Neony doka nonkenh ayuweyenstane I-ih ony akagh-dendy, t'kakonde ro-nonhha en-yakwe.

5 Nonwa eghse Yenkowe isekeh, ne ne o-nenh Enkadoh-hetste ne *Macedonia*: (asekenh t'kakonde nenne-eh eghnonka yenkadonkoghde *Macedonia*.)

6 Neony doka nonna ok yenkatkonden, ony enskatneh endewadoghseron, ne ne aondon yaaghskwayathewe ne jikathahhine kakiok nonka yeyutde jienkagh-dendy.

7 Ikenh Yaghtaonsakwaken ne ji-niyuhhahhes; nok Enkonyadewennodaghkwe ji-nikariwes enskatneh endewe-seke, doka ne Royaner enreghre eghniyawen.

8 Nok t'kakonde Enwake-nisko ne ethoh *Ephesus* nyare yenwaderighwihhewe ne weghniserowanen ne ji-niwaden-yude ne *Jews*-aka.

9 Ikenh kanhohhowanen ne ondennhodonko nokhony akwah yurihhonde niineh, nokhony kentuyghkowanen ne radighswenghse.

10 ¶ Nonwa, doka ne *Timotheus* enrawe, desewakanerak ne naondon aeseveseke yahhothe-non deyutderonghk: ikenh ne royudeghkonh ne raoyudensera ne Royaner, ji-niyught ony I-ih eghniwakyerenh shaden-yawen.

11 Toghsa onghka nonkweweh, ne akarihhonny, aokengh-raden, nok daghnon rodeweyennonnyenh roweyaghsyn ji-nonka ne kayanerenghserakonh, ne naontyesen aonsarawe n'Iihneh; ikenh Riyadisax enskatneh ne onkwadadekenhah.

12 Ji-niyutyerenh ne onkwadadekenhah *Apollos*, eso Deh-hiyadonghwenjonyh ne eghyaarawe isekkeh yekanonghkwe-serakwekonh: nok ji-nihho-nikonghrodenh arekho deroghre eghyaare ne nonwa; nok t'kakonde eghware ne o-nenh yen-kayerine yenhoderighwihheghse.

13 Jatyeghwadenh, eghdejadenghnirat teweghdaghkongh-tserakonh, eghnase-niyer ji-niyught nejin, sewashatstek dagh-non.

14 Sewarighwakwekonh eghnen-yawen enke-ne nadadenoronh.

15 ¶ Wakwennidenghden, dewadadekenhah, (sewayenderyh ne jiro-nonghsode ne *Stephanus*, ne wahhy ne tyutyerenghdonh yunenhondaonh ne *Achius*, neony eghwahhy nonkadyh yehho-nadadaghtkawenh ji-nonkadyh neghnenh-hadiyere norighwadokenghdikeh jityakoyadadokenghdy.)

16 Eghkady nonka yousajadadaghtka yadesewayadighshon ji-niyught ne kenhenh, neony thentkakwekde ji-nikonh ne ne yonkhiye-nawase, neony ne kayudenghsera karonghyakenhonh.

17 Wakatshennonny jiarawe ne *Stephanus*, nokhony ne *Fortunus*, ony ne *Achius*: ne tyuriwa ne ji-nahhoden ne jinyudokdaonh ne isekkeh ro-nonhha wahhy sahadiyeride.

18 Ikenh ro-nonhha wahhy ase sahnonke-nikonghketsko nokhony nise sewanikonra: ne kady wahhonny aesewadondere-ne ne ne jieghnihhadiyadonh.

17 Ne kentyughkwadokenghdiokon ne *Asia* deyetshinonghweradon. *Aquila* nok *Priscilla* yawedowanenin detyetshinonghweradon ne Royanertserakonh, yekakwekonh ne kentyughkwadokenghdy ne ne raodinonghsakonh yederon.

20 Akwekonh ne onkwadadekenhah yadeyetshinonghweradon. Desewadade-nonweronh yadenkanenghrokden dejadatkwanyonh orighwadokenghdikeh.

21 Ne dekanonghweronghtseriyuh ne I-ih *Paul* ne nakwah I-ih kesnonkeh.

22 Doka onghkakiok ne onkweh yaghtthenhho-noronghk'wake ne Royaner Yesus Keristus, kinyuh eghnihhoyadawenh ne *Anathema* Maran-atha, (ne ne wahhonwanadewendeghde ne ji-nadentre ne Royaner.)

23 Ne raodenrat ne Eghjhidewayaner Yesus Keristus ne aedeweseke.

24 Ne jikwanoronghk'wanonweh ne aedeweseke akwekonh ne Yesus Keristustserakonh. *Amen.* Etho-nayawen.

¶ Ne ne tyutyadonghsratyerenghdonh ji-nonka ne *Corinthians* ne roghyadon ne *Stephanas*, nok *Fortunatus*, nokhare *Achaius*, *Timotheus*.

